



SEMINAR KEBATINAN SERANTAU

PENYELEWENGAN KEBATINAN DI SINGAPURA

oleh:

**Y. Bhg. Ustaz Mohd. Haniff Hassan
(SINGAPURA)**

Anjuran :

**Kolej Universiti Islam Malaysia
(KUIM)**

Dengan Kerjasama:

**Yayasan Taqwa Wilayah
Persekutuan Bhd.**

Pada:

15-16 September 2000



SEJARAH RINGKAS PERKEMBANGAN AJARAN SESAT DI SINGAPURA

Sejarah ajaran sesat di Singapura ini sebenarnya setua umur Islam di Singapura dan rantau ini. Ini kerana apabila Islam tiba sahaja di bumi ini, maka bermulalah pertentangan antara yang benar dan yang menyeleweng serta sesat.

Ajaran sesat yang paling lama ialah ajaran Taslim yang dibawa oleh Mohamad bin Shafie @ Mohammad Matahari pada akhir abad ke 19. Ajaran ini bermula di Kg. Seronok, Bayan Lepas, Pulau Pinang¹ dan kemudian berkembang di Singapura.

Namun rekod-rekod PERDAUS mampu meneroka perkembangan ajaran sesat sejak tahun 1940-an. Pada ketika ini timbul keributan mengenai ajaran Qadiani hasil perdebatan hebat antara Allahyarham Tuan Syed Ahmad Dahlan Al-Husaini dengan paderi kecil Qadiani Ghulam Husin, di Onan Road.

Ada di kalangan masyarakat pada masa itu yang mempercayai bahawa Qadiani adalah salah satu mazhab di dalam Islam. Dengan sebab itu ramai di kalangan masyarakat Melayu, terutama yang tinggal di kawasan Geylang, tertipu dengan ajaran Qadiani.

Peristiwa perdebatan di antara Tuan Syed Ahmad Dahlan Al-Husaini dengan Ghulam Husin, pada tahun 40-an itu, telah mampu meredakan ribut yang ditimbulkan ajaran Qadiani, terutama di kalangan masyarakat Melayu yang beragama Islam yang tinggal di sekitar Joo Chiat Road, Geylang Serai, Katong dan Telok Kurau. Namun ajaran itu masih wujud sehingga hari ini.

Masyarakat Islam Singapura pada waktu itu tidak ramai yang mengetahui mengenai ajaran sesat. Jadi walau pun perkembangan ajaran Qadiani dapat dibataskan tetapi keadaan sedemikian memudahkan ajaran-ajaran sesat yang lain mengambil tempat.

Maka pada tahun 1950-an bertiup semula angin ajaran sesat apabila seorang yang berasal dari Pulau Ambon, Indonesia, mengisytiharkan dirinya sebagai seorang Nabi. Pengisytiharannya sebagai seorang Nabi adalah berlandaskan kepada dakwaannya mempunyai salasilah dari keturunan rasul-rasul. Beliau adalah seorang peniaga di Pasar Changi, Geylang.

Pada tahun 60-an tersebar pula satu lagi ajaran sesat yang dinamakan ajaran “Taslim”. Kumpulan ini menggelar diri mereka sebagai masyarakat “Ikhwan”. Hidup kumpulan ini terpisah dari masyarakat Islam biasa. Guru kumpulan masyarakat “Ikhwan” ini pernah mengaku dirinya sebagai nabi dan rasul. Ajaran kumpulan “Ikhwan” ini tersebar di kawasan Joo Chiat Road dan mempunyai cawangannya di beberapa kawasan di Singapura.

Pada tahun 60-an pula, dapat dikesan beberapa ajaran sesat yang dikenali dengan nama “Ilmu Bungkus” di Kampung Woo Mon Chew Road (Siglap), Kampung Tongkang

¹ Lihat halaman web Pusat Islam Malaysia www.islam.gov.my/sesat/BM



Pecah (Jalan Kayu), Kampung Thani (Bukit Timah), Kampung Telok Kurau dan di Kampung Kim Hock Road (Bukit Timah). Ajaran sesat Ilmu Bungkus ini pernah didedahkan oleh PERDAUS pada 17 September 1965, di kawasan Telok Kurau.

Pada tahun 70-an pula tersebar beberapa ajaran sesat. Antaranya :

(a) Ajaran agama Sarasakh

Ajaran agama Sarasakh ini tidak diketahui dari mana asal usulnya, tetapi pernah disebarkan secara rahsia di Singapura. Ajaran agama Sarasakh ini pernah didedahkan oleh Majlis Ugama Islam Singapura melalui khutbah Jumaatnya pada 9 Mei 1976.

(b) Ajaran Ilham Nur Muhammad

Ajaran Ilmu Nur Muhammad ini pernah disebarkan oleh seorang guru ajaran sesat di Kampung Paya, pada tahun 1970. Ajaran ini pernah disiasat oleh Majlis Ugama Islam Singapura (MUIS).

(c) Ajaran Mandi Korban

Ajaran Mandi Korban ini pernah disebarkan oleh seorang guru secara berahsia-rahsia, di kawasan Jurong. Ajaran Mandi Korban ini pernah didedahkan oleh PERDAUS, dalam satu ceramah yang diadakan di Masjid Al-Muttaqin, Ang Mo Kio pada 25hb April 1981.

(d) Tarikat Mufarridiyah

Ajaran Tarikat Mufarridiyah ini pernah tersebar luas secara terbuka di beberapa kawasan seperti di Nee Soon, Sembawang dan Kampung Tanjong Irau, pada tahun sekitar 1972. PERDAUS pernah mendedahkan kesesatan dan penyelewengan ajaran Tarikat Mufarridiyah pada 20hb April 1984 di Masjid Penempatan Melayu, Sembawang.

Pada awal tahun 1980 hingga ke tahun 1988, ajaran sesat yang dilaporkan dan dikesan di beberapa kawasan di Singapura ialah seperti berikut :

1. Ajaran Tarikat Rimau
2. Ajaran Tarikat dan Mengenal Diri
3. Kumpulan Wirid Dalam Selimut
4. Ajaran Hakikat Sembahyang
5. Tarikatul - Islam
6. Ajaran Nikah Batin
7. Ajaran Ilmu Kebatinan
8. Ajaran Kamilulkamil
9. Ajaran Tarikat Kabullani
10. Ajaran Kitab Kamarulhuda
11. Ajaran Kitab Kasyfulasar
12. Ajaran Tauhid Makrifat

13. Ajaran Hakikat Insan
14. Ajaran Martabat 7
15. Tarikat Annuar Asadullah
16. Ahamadiyah
17. Inkarus Sunnah

Ajaran-ajaran yang tersebut di atas pernah didedahkan oleh PERDAUS pada 27hb May 1984 di Masjid Hasanah dan Teban Gardens, pada 28hb Mac 1986 di Masjid Jamiyah Al-Rabitah dan pada 26hb September 1987 di Masjid Darul Makmur.

BEBERAPA PERINCIAN UMUM MENGENAI AJARAN SESAT

Sila rujuk Lampiran A, bagi perincian umum mengenai ajaran sesat berkaitan,

- a. Sifat-sifat & ciri-ciri ajaran sesat.
- b. Kesan-kesan & bahaya ajaran sesat.
- c. Faktor-faktor perkembangan ajaran sesat.

BATINIYAH & AJARAN SESAT DI SINGAPURA

1. Kaitan Sebahagian Besar Dari Ajaran Sesat Yang Didapati Dengan Ajaran Taslim.

Walau pun senarai ajaran sesat yang dilaporkan kepada PERDAUS adalah banyak dengan setiap satu mempunyai nama-nama sendiri tetapi dapatan dari penelitian dokumen-dokumen yang ada menunjukkan di sana terdapat banyak persamaan setiap satu dengan yang lain.

Persamaan yang paling menonjol ialah persamaan ajaran-ajaran berkenaan dengan apa yang terkandung dalam buku Hakikat Insan yang menjadi rujukan utama ajaran Taslim.

Dalam aspek ini, boleh disimpulkan

- bahawa ajaran berkenaan sememangnya datang dari satu sumber yang sama tetapi ahli kumpulan berkenaan mengubah nama kumpulan dan ajaran bagi mengelakkan dari dikenali.
- beberapa perbezaan dari kecil wujud kerana kebanyakan penyampaian ini dibuat melalui lisan semata-mata dan dicatit oleh murid yang mengikuti ajaran berkenaan. Akibatnya timbul beberapa perbezaan kecil tertentu antara satu kumpulan dan kumpulan lain.

- Taslim muncul di Singapura se awal tahun 1940an dan mempunyai pengikut yang ramai pada satu masa dahulu. Ini menjadikannya sebagai antara kumpulan ajaran sesat yang tertua di abad ke 20 dan tidak mustahil, setelah pambanterasan ke atasnya diperhebatkan, bekas-bekas pengikutnya secara rahsia dan bersendirian meneruskan ajaran berkenaan dan mengajarkannya kepada yang lain. Inilah kemungkinan yang menyebabkan elemen ajaran Taslim menyerlah dalam ajaran-ajaran sesat yang dilaporkan kemudian pada tahun-tahun 70an dan seterusnya.

2. Kaitan Ajaran Sesat Dengan Batiniyah Dan Falsafah

Dalam penelitiannya terhadap ajaran Taslim yang mempunyai pengaruh yang kuat terhadap ajaran sesat yang lain di Singapura, PERDAUS bersetuju dengan pandangan bahawa ajaran Taslim, begitu juga ajaran sesat sesudahnya, dipengaruhi kuat oleh unsur

a. Ajaran Batiniyah.

Ini wujud dalam bentuk kaedah penyampaian ajarannya yang menggunakan rajah-rajah dan tafsir-tafsir yang bersifat Isyari' atau batin.

Selain itu, wujud persamaan dari segi kandungan ajaran yang diajarkan dengan ajaran Batiniyah.

b. Ajaran Tasawuf – Falsafah.

Asas ajaran Tasawuf – Falsafah ini mengandungi 2 ajaran utama berikut

- Fahaman Wahdatul Wujud iaitu menempatnya Tuhan dalam diri hamba seperti yang dibawa oleh Al-Hallaj.
- Fahaman Martabat Tujuh yang menyatakan bahawa alam ini adalah limpahan dari zat Tuhan bukan ciptaanNya.

Rujuk Lampiran B bagi perinciannya.

ALIRAN BATINIYAH DI SINGAPURA

Aliran Batiniyah di Singapura boleh dikategorikan dalam dua bentuk

- a. Kewujudannya dalam bentuk ajaran-ajaran yang diajarkan oleh kumpulan ajaran sesat yang bersifat tidak formal seperti yang dinyatakan di atas.
- b. Kewujudannya sebagai satu mazhab yang formal, mempunyai organisasi dan institusi rasmi.

Satu kumpulan yang terserlah dalam kategori ini ialah pengikut ajaran Dawoodi Bohra. Kumpulan ini mempunyai organisasi rasmi. Mereka juga mempunyai masjid tersendiri yang terletak di Hill Street.

Sebagai sebuah wadah rasmi mereka menikmati kemudahan untuk beroperasi secara terbuka. Sebahagian dari individu-individu dari kumpulan ini menonjol dalam kerja kemasyarakatan dan memegang jawatan penting dalam pertubuhan-pertubuhan Islam Singapura.

Walau bagaimana pun, sehingga kini masyarakat Dawoodi Bohra boleh dikatakan sebagai sebuah masyarakat yang eksklusif dan gerakan mereka tidak bersifat *missionary*. Oleh itu, kewujudan mereka amat tidak dirasai oleh masyarakat Islam umumnya dan tidak merupakan ancaman kepada kepercayaan umum yang berteraskan Ahli Sunnah Wal Jamaah.

Satu lagi bentuk ajaran Batiniyah yang wujud ialah mereka yang berfahaman Syi'ah Ismailiyah. Fahaman ini juga bersifat eksklusif yang terbatas kepada keluarga tertentu sahaja. Keluarga berkenaan boleh disifatkan sebagai keluarga yang kaya dan melahirkan tokoh-tokoh perniagaan dan perundangan yang disegani.

Ahli keluarga berkenaan terlibat aktif dalam kerjakerja kemasyarakatan.

PENUTUP

Hari ini apabila kita memperkatakan tentang ajaran sesat dan penyelewengan aqidah, apa yang tergambar di fikiran masyarakat ialah ajaran dan penyelewengan yang wujud pada kumpulan-kumpulan tarikat tertentu atau kumpulan-kumpulan sulit yang mempunyai ciri-ciri;

- berzikir dengan zikir yang tidak betul di dalam gelap beramai-ramai dan bercampur lelaki dan wanita.
- pengajian yang merujuk kepada nota-nota tulisan tangan yang tidak bernama dengan rajah-rajah tertentu atau lain-lain. Rujuk rajah A.

Mengikut rekod yang disimpan oleh PERDAUS, jumlah ajaran sesat yang pernah dikesan sejak tahun 1983 - 1993 ialah sebanyak 29.

Akibat dari pemikiran ini, usaha pembanterasannya ajaran sesat dan penyelewengan aqidah banyak tertumpu kepada ajaran-ajaran yang seperti di atas. Tanpa menafikan penyelewengan dan kesesatan yang ada pada ajaran-ajaran yang seperti itu dan tanpa meremehkannya tetapi sejauh manakah pemikiran ini tepat dan usaha yang telah dilakukan menuju kepada sasaran yang lebih utama dan menyelesaikan permasalahan yang lebih penting sesuai dengan kaedah;

¹ Lihat www.bohra.net, www.mumineen.org, www.malaysia.bohras.net, www.malumamat.com

“Mengutamakan yang lebih penting dari yang penting”

Sepanjang zaman ajaran-ajaran yang seperti ini akan pasti timbul namun hakikatnya ia lebih bersifat *isolated* (terpencil) di dalam masyarakat. Dari sudut jumlah yang terlibat pula, pengalaman dan catatan rekod menunjukkan secara purata mereka yang terpengaruh kepada ajaran-ajaran ini secara purata hanya sekitar 50 orang bagi setiap kumpulan. Jika dikali dengan jumlah ajaran sesat yang telah dikesan kesemuanya berjumlah 1270. Jumlah ini jika dibanding dengan jumlah masyarakat Islam Singapura seramai 407.600 hanya merupakan 0.32 % sahaja. Dari sudut kesan sampingan, tidak dinafikan bahawa pengikut-pengikut ajaran ini menimbulkan masalah sosial seperti kekecohan rumahtangga namun ia masih bersifat *isolated* (terpencil).

Penyelewengan aqidah yang lebih bahaya dan berleluasa di dalam masyarakat hari ini ialah terletak kepada pelanggaran dan peninggalan tuntutan dan konsep dua kalimah syahadah yang merupakan batas pemisah antara iman dan kufur yang boleh merosakkan aqidah seseorang. Hakikat bahawa dua kalimah syahadah mempunyai tuntutan yang perlu dipenuhi adalah satu perkara yang tidak diketahui umum. Oleh itu pelanggarannya selalu tidak disedari apatah lagi ia selalu berlaku secara tidak langsung.

Ajaran sesat yang lebih bahaya dan berleluasa pula di hari ini sebenarnya ialah ideologi-ideologi manusia yang meresap ke pemikiran umat Islam masa kini yang mengakibatkan kekaaburan terhadap tasawur Islam dan pengenalannya. Begitu juga dengan teori-teori ilmiah yang meresap ke pelbagai disiplin ilmu melalui topeng kajian akademik yang kemudiannya dianuti oleh umat Islam tanpa disedari. Contoh yang jelas ialah sekularisma, materialisma, liberalisma dan gerakan yang memperjuangkan kebebasan mutlak wanita.

Wallahu A'alam

Muhammad Haniff Hassan
Singapura

LAMPIRAN B

1. CONTOH-CONTOH AJARAN YANG MENYELEWENG YANG DITEMUI YANG BERBAU AJARAN BATINIYAH, FALSAFAH DAN MISTIK

a. Berkaitan Dengan Dua Kalimah Shahadah

Dalam buku Hakikat Insan¹ tertulis

“Adapun kalimah “ لا اله الا الله ” dinamakan Syuhadat Tauhid, sebab di dalam kalimah tersebutlah kita bersaksi dengan sepenuh rasa bahawa tiada yang lain hanya Allah semata-mata tiada sekutu baginya di dalam segala-gala hal dan tiada sesuatu pun yang bercampur aduk dengannya kecuali Dia sedia-dia. Oleh itulah kita bersaksi dengan diri kita sendiri tiada yang nyata pada kita hanya Allah semata, kita nafi tubuh kita dan kita isbatkannya kepada nyatanya Allah semata-mata (diri batin kita).

Adapun kalimah محمد رسول الله itu dinamakan Syuhadat Rasul. Sebab pada kalimah ini kita melafazkan bersaksi bahawa yang menyampaikan dan menanggung diri rahsia Allah adalah محمد iaitu diri zahir kita dan dengan melafazkan kalimah tersebut maka berikrar dan bersaksilah kita dengan diri kita sendiri bahawa diri zahir kita tetap akan menanggung rahsia Allah dan akan menjaganya buat selama-lama.

Adapun hakikat ketuhanan itu adalah diri batin kita (Rohani) dan hakikat kerasulan itu adalah diri zahir kita (Jasmani). Diri batin adalah sebenar-benar diri yang menyatakan rahsia Tuhan dan untuk menyatakan diri rahsia Allah tersebut adalah diri zahir kita. Jadi dari zahir kitalah, yang menyatakan rahsia ketuhanan Allah s.w.t. Oleh yang demikianlah diri zahir kita ini digelar Hakikat Rasul.

Bila kita melafazkan kalimah

“*Lailahailallah*”

Maknanya

¹ Haji Ahmad Laksamana bin Omar, *Hakikat Insan*, cetakan pertama, Kota Bahru, 1985.

“Tiada nyata hanya Allah”

Dari sini jelaslah kalimah

لا اله الا الله

Itu sudahlah terang bagi menyatakan tentang diri batin kita. Bila sahaja kita lafazkan kalimah tersebut dengan jelas kita memperakui dengan sesungguhnya, bahawasanya *“Tiada nyata hanya Allah”* dialah rahsia Allah yang dikandung oleh tubuh zahir kita.

Adapun kalimah:-

“Muhammadurrasulullah” محمد رسول الله

Pula pada menyatakan diri kasar kita kerana hakikat bentuk manusia itu berhakikat dengan huruf *“Muhammad”*.

Justeru itu bila kita melafazkan kalimah

“Asyhadu anlailaha illallah wa asyhadu anna Muhammadarrasulullah”

maka kalimah yang telah dilafazkan itu adalah meliputi pada menyatakan diri batin dan diri zahir kita (Rohani dan Jasmani) iaitu kita menyaksikan bahawa yang dikandung oleh diri kasar kita ini adalah diri rahsia Allah s.w.t. dan diri kasar inilah merupakan sarongnya.

Seperti firman Allah s.w.t. di dalam hadits Qudsi:-

“Al-Insan sirri wa Ana sirruhu” الإنسان سرِّي وأنا سره

Ertinya:-

“Manusia itu adalah rahsiaKu dan Akulah rahsianya.”

Allah s.w.t. mengurniakan manusia untuk memegang dan bertanggungjawab terhadap rahsiaNya yang ditanggung oleh manusia itulah Allah s.w.t. telah memberi satu penghormatan besar terhadap kejadian manusia Al-Quran.

Kejadian manusia adalah satu-satu kejadian yang paling rapi. Elok tersusun pada zahir dan batin.

Duduk kemuliaan manusia adalah kerana manusialah sahaja kejadian Allah yang sanggup memegang rahsiaNya. Sedangkan sebelumnya Allah s.w.t. sendiri pernah menawarkan rahsia ini kepada langit, bumi, bukit bukau untuk menanggungnya. Tetapi semuanya makhluk kejadian tersebut tidak mempunyai kesanggupan untuk menanggungnya.

Seperti firman Allah di dalam Al-Quran:-

Ertinya:-

“Sesungguhnya rahsia Aku ini pernahKu tawarkan kepada langit, bumi gunung ganang tetapi mereka enggan menerimanya kerana takut mengabaikannya tetapi yang sanggup menerima adalah manusia.”

Dari itu bila kita mengucap:-

“Asyhaduanlailahailallah wa asyhadu anna Muhammadarrasulullah”

maka berertilah kita bersaksi dengan diri kita sendiri bahawa tiada yang nyata pada diri kita hanya Allah semata-mata dan tubuh zahir kita adalah tukang penyata pada rahsia Allah semata-mata.

Di samping itu diingatkan bahawa kalimah tauhid ini juga mengandungi 24 huruf semuanya bagi menandakan Kehidupan manusia adalah 24 jam dalam sehari semalam. 12 jam siang dan 12 jam malam².

Bermula “La” itu adalah martabat zat semata-mata atau bolehlah dinamakan juga martabat “La Ta’yan” pada peringkat ini belum awal belum akhir belum jadi matahari dan belum jadi sesuatupun. Ghaibul ghuyub غائب الغيوب makamnya adalah pada makam sir “سِر” atau rahsia semata-mata.

Pada martabat “La Ta’yan” ini alam adalah “Ahadah” dan dirinya adalah diri Sendiri.

Syariatnya adalah pada lidah.

² Haji Ahmad Laksamana bin Omar, *Hakikat Insan*, ms 105.

Bermula “Ilah” itu letaknya pada martabat sifat ataupun dinamakan juga martabat “La Ta’yan Awwal” iaitu sabit nyata awal. Martabat ini juga pernah dipanggil martabat Noktah satu.

Pada peringkatnya ini, makamnya adalah kalbi “قلبي”. Alam di martabat ini adalah alam “Wahidah”. Adapun diri pada martabat ini adalah diri Terdiri.

Hakikat Pada Kalbi

Adapun “Illa” itu letaknya pada martabat Asma’ “اسماء” atau ianya juga disebut sebagai martabat “La Ta’yan Thani” atau sabit nyata kedua. Ianya juga biasa digelar sebagai martabat Noktah Dua.

Pada peringkat ini makamnya adalah zikir. Manakala alamnya adalah alam “Wahidiah”.

Di samping itu perlu ditegaskan diri pada martabat ini adalah Diri Tajalli dan Tarikatnya adalah zikir.

Adapun “Allah” itu dinamakan dia martabat Afaal “افعال”. Ianya juga dinamakan martabat “Alif” atau martabat Insanul Kamil “انسان كامل”. Makamnya pada peringkat ini adalah makam anggota rahsia (diri rahsia).

Dan alamnya pada martabat ini adalah alam Insan “انسان” manakala dirinya adalah diri Terperi sedangkan makrifatnya adalah anggota rahsia. (diri batin manusia).

Hakikat Huruf “Muhammad”

Adapun perkataan “Muhammad” itu terdiri daripada empat huruf iaitu “Mim Ha Mim Dal”. Adapun huruf “Mim” yang pertama itu adalah kepala kita. Huruf “Ha” itu adalah hakikat dada kita, huruf “Mim” kedua itu adalah hakikat pusat kita dan “Dal” itu adalah hakikat kaki kita dan sayugia diingatkan bahawa hakikat “Muhammad” itu adalah diri kasar kita.

Hakikat huruf “Rasul”.

Adapun hakikat perkataan “Rasul” itu adalah hakikat nyawa kita yang menjadi penyambung rahsia di antara jasmani dengan rohani.

Bermula huruf rasul itu mengandungi empat huruf “Ra Sin Wau Lam”. Adapun huruf “Ra” itu adalah hakikat nafas “نفس”. Huruf “Sin” itu adalah hakikat Ampas “انس”. Huruf “Wau” itu adalah hakikat Tanapas “تنفس” dan huruf “Lam” itu adalah hakikat Nupus “نفوس”.

Perlu ditegaskan di sini bahawa nyawa itu dijadikan dari Jauhar Basita dan ianya terbahagi kepada 4 peringkat:

1. Nafas
2. Ampas
3. Tanapas
4. Nupus³

Seterusnya tertulis di dalam buku Hakikat Insan⁴

“Disini terang dan jelaslah bahawa kalimah penting itu dilafazkan oleh kita bagi tujuan supaya kita menilik diri kita dengan mata hati kita bahawa akulah yang membawa rahsia Allah dan kita tilik dengan mata zahir dan batin kita bahawa kita adalah Allah semata-mata tiada sesuatu pada kita hanya Allah semata-mata
Disini terang dan jelaslah bahawa kalimah penting itu dilafazkan oleh kita bagi tujuan supaya kita menilik diri kita dengan mata hati kita bahawa akulah yang membawa rahsia Allah dan kita tilik dengan mata zahir dan batin kita bahawa kita adalah Allah semata-mata tiada sesuatu pada kita hanya Allah semata-mata.”

Ditulis juga dalam buku Hakikat Insan⁵

Dan sayugia diingatkan bahawa kenyataan yang dinyatakan diatas bukanlah sekali-kali kita boleh beriktikad bahawa Allah s.w.t. itu duduk di dalam diri kita. Jika kita beranggapan begitu maka kafir jadinya dan keadaan yang diterangkan diatas juga bukan sekali-kali boleh beriktikad bahawa diri batin kita (roh) itu Tuhan dan bertuhankan diri. Jika berbuat demikian kafir pula jadinya.

Mengenai dua kalimah syahadah, ada ajaran pula yang menyatakan

³ Haji Ahmad Laksamana bin Omar, *Hakikat Insan*, ss 119 – 121.

⁴ Haji Ahmad Laksamana bin Omar, *Hakikat Insan*, ms 93 – 95.

⁵ Haji Ahmad Laksamana bin Omar, *Hakikat Insan*, ms 94

Adapun huruf (alif) pada huruf “Lam Alif” itu mengisytiharkan kepada “ ا د م ” (Adam) iaitu bapa sekalian jasad.

Di mana Adam dan anak cucunya yang menanggung rahsia Allah ini akan diuji kesetiaan sumpah janji dengan ujian iblis, syaitan dan kunci-kuncunya. Mereka harus tahan diuji jika mahu menjadi pemegang amanah yang sejati dan khalifah Allah di alam maya ini.

Seperti firman Allah di dalam Al-Quran:-

Surah Al-Baqarah : ayat 34

Ertinya:

وَاذْكُرْ لَنَا الْوَعْدَ الَّذِي كُنَّا نَعِدُّكَ بِهِ إِذْ قُلْنَا لِلْمَلَائِكَةِ اسْجُدُوا لِآدَمَ فَسَجَدُوا إِلَّا إِبْلِيسَ
“Dan ingatlah, Kami berfirman kepada malaikat supaya sujud kepada Adam, maka sujudlah mereka kecuali iblis”

Dan firman Allah lagi:

Surah Yasin : ayat 60

Ertinya:

أَلَمْ أَعْهَدْ إِلَيْكُمْ يَا آدَمُ أَنْ لَا تَعْبُدُوا الشَّيْطَانَ إِنَّهُ لَكُمْ عَدُوٌّ مُبِينٌ
“Bukan Aku telah memerintah kepada kamu hai bani Adam supaya kamu tidak mematuhi kehendak syaitan. Sesungguhnya syaitan itu adalah musuh yang nyata”

Dan firman Allah lagi:

Surah Al-Balad : ayat 4

Ertinya:

وَلَقَدْ خَلَقْنَا الْإِنْسَانَ فِي كَبَدٍ
“Sesungguhnya Aku jadikan manusia itu adalah untuk diuji (susah payah)”

Dan bermula huruf “Mim” itu mengisyaratkan kepada “ م ” iaitu Muhammad (bapa roh) kerana setiap yang ada dan wujud ini adalah daripada “Nur Muhammad” yang ditajalkan dari alam “Ghaibul Ghaib”.

Seperti firman Allah di dalam Al-Quran, surah Al-Hadiid : ayat 3.

Iaitu pada menyatakan “Awal Muhammad”, “Akhir Muhammad”, “Zahir Muhammad” dan “Batin Muhammad.”

Di samping itu untuk menjadi contoh atau model segala corak hidup yang diredhai oleh Allah s.w.t. adalah cara kehidupan Nabi Muhammad s.a.w.

Seperti firman Allah s.w.t.

Surah: Al-Anbiyaa’ : ayat 107

Ertinya:

وما ارسلناه الا رحمة للاولين

“TidakKu utuskan engkau (Muhammad) kecuali untuk membawa rahmat kepada sekalian alam”

Dialah contoh yang harus diikuti oleh manusia, jika keredhaan Allah hendak dicapai.”

c. **Pengertian Iman**

Rujuk rajah menerangkan Iman dari buku Hakikat Insan⁷.

d. **Pengertian Makrifat**

Rujuk rajah yang ditunjukkan⁸.

e. **Penerangan Nama Allah**

Rujuk rajah yang ditunjukkan⁹.

f. **Hakikat Sembahyang**

“Adapun hakikat sembahyang itu adalah berdiri menyaksikan diri sendiri. Sembahyang untuk bersaksikan dengan diri kita sendiri bahawa tiada yang nyata pada kita adalah “Allah” (diri batin) dan “Muhammad” itu adalah diri zahir kita yang membawa dari menanggung rahsia Allah s.w.t.

⁷ Haji Ahmad Laksamana bin Omar, *Hakikat Insan*, ms 77 - 78.

⁸ Haji Ahmad Laksamana bin Omar, *Hakikat Insan*, ms 84.

⁹ Haji Ahmad Laksamana bin Omar, *Hakikat Insan*, ms 114 - 115.

Adapun hakikat sembahyang itu terkandung di dalam Al-Fatihah iaitu pada perkataan "Alhamdu" kerana sembahyang yang diterima oleh Rasulullah ketika Israk dan Mikraj itu berhakikatkan perkataan "Al-Hamdu", kerana mengambil sempena akan hakikat perkataan pertama lembaga Adam (a.s.) setelah Jibrail memasukkan roh (diri batin) Adam. Di mana apabila sahaja roh tersebut sampai ketahap dada lembaga Adam pun terus cuba berdiri dan bersin dengan disertakan kata "Alhamdulillah".

Ertinya:-

Pujaan terhadap Allah dan di atas asas tersebutlah Nabi Besar Muhammad (s.a.w.) menerima sembahyang dari Tuhannya berdasarkan الحمد لله.

Adapun hakikat sembahyang sesungguhnya berhakikat "Al-Hamdu". Bermula huruf "Alif" itu adalah hakikat niat sembahyang kita. Huruf "Lam" itu adalah hakikat berdiri. Huruf "Ha" itu adalah hakikat rukuk dan "Mim" itu adalah hakikat sujud dan "Dal" itu adalah hakikat duduk di antara dua sujud sebab itulah sembahyang kita tidak mempunyai persamaan dengan sembahyang ugama-ugama lain.

Adapun perkataan "Al-Hamdu" ertinya memuji, apa yang dipuja adalah zat, sifat, asma' dan apaal Allah s.w.t.

Sebagai firman Allah di dalam Hadits Qudsi:-

Manusia itu adalah rahsiaKu dan Akulah rahsianya

Perkataan pertama di dalam pemujaan dan pujian kita di dalam sembahyang adalah dengan kita berkata "Allahu Akbar" iaitu di dalam Takbir-atul-ihram. Kita berkata demikian kerana mengambil sempena kata-kata manusia pertama Adam (a.s.) di kala sempurnanya roh "Ruh Rabbani" diri rahsia Allah dimasukkan ke dalam tubuh lembaganya. Lantas Adam pun berdiri menilik dirinya yang elok dan terus Baginda berkata "Allahu Akbar"

Adapun hakikat rukun sembahyang itu adalah 13 perkara. Iaitu kerana mengambil sempena hakikat sendi besar manusia yang bergerak dan membolehkan manusia membuat kerja dan sebagainya.

Sendi-sendi tersebut adalah seperti berikut: -

1. Sendi tengkok
2. Sendi bahu kanan
3. Sendi lengan kanan
4. Sendi tangan kanan
5. Sendi bahu kiri
6. Sendi lengan kiri
7. Sendi tangan kiri
8. Sendi paha kanan
9. Sendi pada kiri
10. Sendi lutut kanan
11. Sendi kaki kanan
12. Sendi lutut kiri dan
13. Sendi kaki kiri

Adapun hakikat kenapa 17 rakaat sembahyang lima waktu sehari semalam kerana mengambil sempena dengan lima perkara. Iaitu “Ah, Allah, Muhammad, Adam, Hawa”

Adapun perkara “Ah” itu mengandungi 2 huruf menandakan sembahyang Subuh.

Perkataan “Allah” itu mengisyaratkan kepada sembahyang Zohor. Perkataan Muhammad “Muhammad” itu mengisyaratkan sembahyang Asar. Perkataan “Adam” itu mengisyaratkan sembahyang Maghrib, dan perkataan “Hawa” itu adalah mengisyaratkan sembahyang Isyak.

Bermula sembahyang Subuh itu dua rakaat sebab tabiat sesuatu itu adalah dengan dua perkara iaitu Zat dan Sifat.

Sembahyang Zuhur 4 rakaat sebab Tajalli “تجد” Allah itu dengan perkara iaitu

Sembahyang Asar 4 rakaat sebab Tajalli hamba itu dengan 4 perkara iaitu tanah, air, api dan angin.

Sembahyang Maghrib itu 3 rakaat sebab Tajalli Tuhan itu dengan 3 perkara iaitu “Ahdah” – “Wahdah” dan “Wahidiah”.

Sembahyang Isyak itu 4 rakaat sebab Tajalli hamba itu dengan 4 perkara iaitu “Di”, “Wadi”, “Mani” dan “Manikam”¹⁰.

¹⁰ Haji Ahmad Laksamana bin Omar, *Hakikat Insan*, ms 143 – 145.

Mengenai sembahyang, di dalam nota ajaran bernama Hak Aku¹¹ tertulis pula

“TAJLI WAKTU

Ini bab pada menyatakan asal tajali waktu kalam Nabi s.a.w.

Maka sabda Nabi s.a.w.

“Ketahuilah olehmu hai Talib asal tajali waktu. Maka sabda Rasulullah kepada Abu Bakar dan Umar dari Osman dan Ali r.a., maka sabda Rasulullah s.a.w. “Barang siapa mengetahui tajali waktu itu maka sempurnalah sembahyang dan makrifatnya dan inilah yang dinamai asal fardu itu dua raka’at kerana ta’in itu dua perkara pertama zat kedua sifat”. Maka sembah baginda Ali, “Ya Junjunganku apa sebab waktu zuhur itu empat raka’at?”. Pertama ujud kedua ilmu ketiga Nur keempat suhud. Maka sembah Ali, “Ya Junjunganku apa sebab waktu Asar empat raka’at?”. Kerana Tajali hamba itu empat perkara. Pertama air, kedua api, ketiga tanah dan keempat angin. Maka sembah baginda Ali, “Ya Junjunganku apa sebab Maghrib itu tiga raka’at?”. Maka sabda Rasulullah s.a.w. “Ya Ali sebab waktu Maghrib tiga raka’at sebab tajali Allah itu tiga perkara. Pertama Ahdiyati ertinya zat, kedua wahdat ertinya sifat, ketiga wahdiyati ertinya af’al”. Maka sembah baginda Ali, “Ya Rasulullah apa sebab waktu Isyak itu empat raka’at?”. Maka sabda Rasulullah, “Kerana Tajali hamba itu empat perkara. Pertama Wadi, kedua mazi, ketiga mani, keempat maknikam. Adapun wadi itu menjadi darah dan mazi itu menjadi daging dan mani itu menjadi aurat dan maknikam itu menjadi cahaya”.

Adapun perbuatannya sembahyang empat perkara. Kiamu yakni berdiri betul, kedua rukun yakni tunduk, ketiga sujud yakni mencengkur dan keempat duduk yakni tetap. Maka kiamu itu peel api dan rukun itu angin dan sujud itu af’al air dan duduk itu af’al tanah. Adapun waktu yang lima itu keluar daripada huruf, maka adalah waktu yang lima itu keluar daripada huruf Alham(du). Maka waktu zuhur itu keluar daripada huruf “Alif” dan waktu Asar itu keluar daripada huruf “Lam” dan waktu Maghrib itu keluar daripada huruf “Ha” dan waktu Isyak itu keluar daripada huruf “Mim” dan waktu Subuh itu keluar daripada huruf

¹¹ Nota ajaran sesat yang diserahkan kepada PERDAUS.

“Dal”. Adapun waktu Zuhur itu dan waktu Asar itu disucikan..... bacaannya dan waktu Maghrib dan waktu Isyak dan Subuh itu dinyaringkan bacaannya ialah kerana huruf Alif dan huruf Lam itu keluar daripada lafas namanya Allah Ta’ala kerana bahawasanya Allah Ta’ala itu tiada berlain kerana ia batin dan sebab itulah sembahyang, zuhur itu disucikan adapun waktu yang ketiga itu sebab dinyaringkan kerana keluar huruf Ha dan Mim dan Dal itu kerana huruf Ahmad itu pohon Ta’in. Inilah menyatakan Zat Allah dan Sifat Allah.

Adapun sekalian Ta’in itu menzahirkan tanda ada Allah Ta’ala. Itulah nyata daripada sebabnya maka tiga waktu dinyaringkan kemudian disucikan pula dan segala Ta’in itu daripada Ta’in juga adanya..... Maka kembalikan pula kepada Ta’in juga seperti hundur Rahmat Illahi. Ka-makan ertinya dahulu pun adanya sekarang pun adanya. Jika dahulu pun tiada berta’in maka sekarang pun tiada berta’in kerana zahir itu kembali kepada batin. Maka pertama dinyaringkan, kemudian dibunyikan pula. Maka barangsiapa tahu akan hakikat sembahyangnya, ketahui olehnya kiblat sembahyang tiga perkara. Pertama kiblat tubuh kaabah Allah maka hendaklah segala orang Islam itu sembahyang mengadap kiblat itu tiada sah sembahyangnya. Maka hendaklah kita hadpkan dada kita itu kepada Ka’abah Allah yakni segala uratnya dan dagingnya dan darahnya dan ruhnya sekalian hendaklah dihadapkan kepada Ka’abah Allah kerana difardukan Allah Ta’ala s.w.t. Segala orang Islam itu mengadap Ka’abah Allah itu maka sahlah sembahyangnya. Adapun kiblat hati kepada Tuhan Ka’abah Allah. Adapun kiblat nyawa itu kepada rahsia maka bahawasanya Allah Ta’ala itu tiada pada Ka’abah Allah dan tiada kiri dan tiada ia kanan dan tiada ia dihadapan dan tiada dibelakang dan tiada ia diatas dan tiada ia di bawah, boleh ditentukan dengan suatu tempat tetapi meliputi sekalian alhamdu ertinya Isak Allah Ta’ala meliputi sekalian alam seperti firman Allah Ta’ala di dalam Al-Al-Quran: -

Wallah muhitun minal alamin.

Ertinya: -

Allah juga meliputinya sekalian alam.”

g. Martabat Tujuh & Hakikat Kejadian Manusia

Martabat Tujuh adalah ajaran yang menyatakan bahawa kejadian alam dan manusia adalah hasil limpahan atau tajalli Allah taala yang berlaku sebanyak tujuh tahap, proses, martabat atau maqam.

Ajaran ini wujud dalam banyak ajaran-jaran yang menyeleweng yang berselindungkan ajaran Tarikat dan Tasawuf.

Bahaya ajaran ini ialah ia menimbulkan syubhat bahawa alam dan manusia ini adalah sebahagian dari zat Allah taala. Oleh itu untuk mencapai makrifat dan hakikat ia perlulah mempertingkatkan dirinya sehingga mampu untuk kembali kepada Allah dan fana' atau hulul "serap" bersama Allah taala.

Ajaran ini juga menimbulkan syubhat bahawa dalam diri manusia ada unsur zat Allah taala dan ia boleh bergabung dengan Allah taala apabila mencapai kesempurnaan.

Rujuk ulasan buku Hakikat Insan, Ad-Dur An-Nafis dan Kamarul Huda.

h. Penerangan mengenai huruf-huruf Arab

Pengenalan hak-hak huruf dari Alif hingga Ya¹²

Huruf	Erti	Huraian
Alif Ba Taat Tsa	Diri Benih Taat Pengkakuan	Allah jadikan alam dunia ini untuk mengetahui hak-hak Allah dalam dunia jadikan diri kita umat Islam dan beriman kepada Allah ikut perjalanan nabi Muhammad
Jim Ha Kha Dal	Perjalanan Ahmad Faham Sujud	Allah bagi kita perjalanan dalam dunia ini ikut perjalanan nabi Muhammad supaya kita faham untuk sujud kepada Allah selagi hidup hak berbuat kita bekal mati
Dzal Ra Zai Sin	Zaman Rahmat Zalim Suara	Allah jadikan kit azaman kecil dahulu banyak rahmat yang kita rasakan dan janganlah sudah besar kita menjadi zalim pada suara kita nanti
Syin Sod Dhod To	Saat Solih Da'if Tamak	Allah jadikan hari siang dan malam adalah daripada saat yang kita kejar waktu soleh jangan kurang ibadat kita pada Allah jadi kita tidak daif di akhirat nanti biarlah kita tamak hak perjalanan Rasulullah punya sunatnya itu tidak menjadi apa-apa.
Dzo	Tahif (Zahir)	Allah berikan tahif (zahir) ini kepada nabi

¹² Dipetik dari sebuah nota ajaran sesat yang dilaporkan pada PERDAUS.

Ain Ghain Fa'	Anggota Ghaib Fana'	Muhammad yang punya anggota berbeza daripada makhluk yang lain Allah ciptakan dan dialah satu-satunya yang mendapat kuasa ghaib berserta dapat memfana'kan hak Allah
Qaf Kaf Lam Mim	Al-Quran Rangka Allah Mukmin	Allah jadikan nabi Adam dalam tubuh dia ialah hak Al-Quran serta rangkanya dengan huruf-huruf Allah pada mereka orang yang pertama sekali mukmin kepada Allah
Nun Wau Ha Lam alif	Nazran Umat Hamilan Allah dengan diri kita	Allah jadikan kita dengan anazaran nabi Adam jadilah satu umat ialah Siti Hawa dalam hamilan nabi Adam Allah dan Hawa berserta ada pada diri kita semuanya.

Di dalam sebuah nota yang bernama Seri Manikam¹³ ditulis pula

Faedah-faedah huruf yang ada dalam diri kita:

Alif	Urat Putihku yang tiada berdarah	Nabi Adam a.s
Be	Benihku Mustika Muhammad Tulang Salbi	Siti Hawa a.s
Te	Kedu-dua keningku	Nabinya Yusuf a.s
Tha	Jantungnya	Nabinya Tab a.s
Jim	Tulangku	Nabinya Yakob a.s
Ha	Dadaku	Nabinya Harun a.s
Kha	Halkomku	Nabinya Ishak a.s
Dal	Dahiku	Nabinya Ayub a.s
Zal	Tengkokku	Nabinya Hud a.s
Ra	Tulang rusokku	Nabinya Elias a.s
Zai	Bulu Romaku	Nabinya Dzulkifli a.s
Sin	Kuku-kuku semuanya	Nabinya Alisak a.s

¹³ Dipetik dari sebuah nota ajaran sesat yang dilaporkan pada PERDAUS.

Syin	Batang leherku	Nabinya Tupsir Dzulkarnain a.s
Sad	Mempedu	Nabinya Yusak a.s
Dhad	Anak tekakku	Nabinya Daud a.s
Thaa	Kulitku	Nabinya Eunus a.s
Zha	Dagingku	Nabinya Ismail a.s
A'in	Rambutku	Nabinya Sri Tawakal Ibrahim a.s
Ghain	Darahku	Nabinya Talut a.s
Fa	Pusatku	Nabinya Nuh a.s
Kaf	Susuku, tetekku kedua	Nabinya Yahya a.s
Qaf	Limpaku	Nabinya Zakariah a.s
Lam	Lidahku	Nabinya Musa a.s
Mim	Mataku kedua	Nabinya Idris a.s
Nun	Ubonku	Nabinya Muhammadinil Mustafa s.a.w
Waw	Otakku	Nabinya Seth a.s
Haa	Hatiku	Nabinya Hidir a.s
Lam alif	Rohku	Nabinya Isa a.s
Hamzah	Shahwatku	Nabinya Sulaiman a.s
Ya	Mani manikam	Embun setitik embun sejati

i. Nur Muhammad

Di dalam buku Hakikat Insan telah ditulis.

Sesungguhnya “Nur Muhammad” itu adalah dari “Nur Allah” yang di Tajalli dengan empat anasir iaitu “Shuhud” – “Nur”- “Ilmu” – “Wujud” dan Adam itu dari “Nur Muhammad” yang ditajalli dengan empat anasir iaitu Tanah Nuruni, Angin Nuruni, Air Nuruni dan Api dan bermula manusia itu adalah daripada Adam dengan ditajallikan dengan empat perkara juga iaitu “Di”, “Wadi”, “Mani” dan “Manikam”¹⁴.

j. Penjelasan Mengenai Al-Fatihah

Di dalam sebuah nota ajaran sesat ditemui ajaran berikut

Penerangan tersirat dari ayat Al-Fatihah¹⁵

Bismillah Ar-Rahman Ar-Rahim	Menemui ia akan dirinya Ya Muhammad Engkau jua keadaanku Ya Muhammad engkau kekasih ku tiada lain dari padamu
Al-Hamdulillah	Ya Muhammad yang sembahyangmu ganti sembahyangku tempat aku memuji diriku Ya Muhammad aku tuhan sekalian alam
Rabbil A'lamin	Ya Muhammad aku membaca Al-Fatihah aku yang memuji pun aku Ya Muhammad akulah raja yang maha besar engkaulah kerajaanku
Ar-Rahmanir Rahim	Ya Muhammad yang sembahyang itu aku memuji akan diriku Ya Muhammad tiada kenyataanku jika tiada engkau kerana engkau kenyataanku
Maliki yaumiddin	Ya Muhammad yang awal dan yang akhir dan keadaanmu itu keadaanku Ya Muhammad sebab pun aku sukakanmu kerana aku murahkanmu
Iyyaka na'budu	Ya Muhammad kerana aku murah kepada mu engkau kekasihku kepada aku Ya Muhammad jika tiada aku tiadamu
Wa iyyaka nasta'in	Ya Muhammad rahsiaku, rahsiamu
Ihdinas Siratal Mustaqim	
Siratallazina An'amta A'laihim	
Ghairil Maghdubi A'laihim	

¹⁴ Haji Ahmad Laksamana bin Omar, *Hakikat Insan*, ms 145

¹⁵ Dipetik dari nota *Tarikatul Islam* dalam simpanan PERDAUS. Lihat juga Hj. Abdullah Hj. Abd Wahab, *Tentang Dan Cabaran Kepada Islam Sepanjang Zaman*, ms : 74 bagi perbandingan.

Walad Dhalin
Amin

Terdapat juga ajaran yang menyatakan bahawa ayat Al-Fatihah menyatakan sembilan nabi¹⁶

Al-Hamdulillah Rabbil A'lamin	Kepada nabi Adam
Ar-Rahmanir Rahim	Kepada nabi Daud
Maliki yaumiddin	Kepada nabi Sulaiman
Iyyaka na'budu	Kepada nabi Ibrahim
Wa iyyaka nasta'in	Kepada nabi Ayub
Ihdinas Siratal Mustaqim	Kepada nabi Yakub
Siratallazina An'anta A'laihim	Kepada nabi Musa
Ghairil Maghdubi A'laihim	Kepada nabi Isa
Walad Dhalin	Kepada nabi Muhammad

Terdapat juga ajaran yang menyatakan bahawa ayat Al-Fatihah yang ada dalam tubuh nabi Muhammad s.a.w¹⁷

Al-Hamdu	Badan Muhammad
Lillah	Hati Muhammad
Rabbil A'lamin	Rasa Muhammad
Ar-Rahman	Nur Muhammad
Ar-Rahim	Kulit Muhammad
Maliki	Darah Muhammad
Yaumiddin	Urat Muhammad

¹⁶ Hj. Abdullah Hj. Abd Wahab, *Tentangan Dan Cabaran Kepada Islam Sepanjang Zaman*, ms : 75 – 76.

¹⁷ Ibid, ms 76.

Iyyaka	Kuku Muhammad
Na'budu	Pusat Muhammad
Wa iyyaka	Daging Muhammad
Nasta'in	Ucapan Muhammad
Ihdina	Pembahu Muhammad
As-Sirat	Pendengaran Muhammad
Al-Mustaqim	Pemandangan Muhammad
Sirat	Mata Muhammad
Allazina	Limpa Muhammad
An'amta	Nabinya Muhammad
A'laihim	Walinya Muhammad
Ghairil Maghdubi	Shahadahnya Muhammad
A'laihim Walad Dhalin	Sumsum Muhamma, Penerimaan Muhammad
Amin	Kasih keduanya Allah dengan Muhammad

Di dalam sebuah nota ajaran yang bernama Hak Aku ditulis¹⁸

“Syariat Di Dalam Fateha

Inilah sah Fateha yang terikat di dalam Insan, sekiranya sesiapa mengetahui barulah sah ia mengerjakan apa-apa. Barang siapa tidak mengetahui akan hakikat yang demikian tidaklah boleh membaca doa dan mengajar Al-Al-Quran juga berdalil Al-Al-Quran atau muzakara-kipaya. Kerana ialah ilmunya yang terkandung di dalam Al-Fateha.

- | | | |
|---------------|---|--|
| Bissmilla | - | maknanya kepala kepada kita |
| Rahman | - | otak kepada kita |
| Rahim | - | anggara (pusat) yakni akal kepada kita |
| Alhamdulillah | - | muka kepada kita |

¹⁸ Nota ajaran bernama Hak Aku bertulis tangan.

Rabbilalamin	-	telinga kanan bagi kita
Nirrahim	-	telinga sebelah kiri kita
Malikiyaumiddin	-	tapak tangan kanan kita
Iyakanakbudu	-	tulang belakang pada kita
Waiyakanasta'in	-	dada pada kita
Ihdiyassiratalmustakim	-	niat ataupun yang lebihnya
Siratallazinaanamta'alaihim	-	yang telah ada dinadakan pada kita
Ghairilmaghdubil	-	limpa kepada kita
Alaihim	-	hati kepada kita
Walladdalin	-	guru (akal) pada kita
Amin	-	jantung pada kita”

Kesimpulan Umum

Kesimpulannya ialah, semua ajaran di atas adalah tertolak. Oleh itu, sesiapa sahaja yang menemui ajaran yang dinyatakan di atas atau yang seumpamanya maka hendaklah meninggalkan ajaran berkenaan atau tempat pengajian berkenaan.

2. BUKU & KITAB YANG MENGANDUNGI AJARAN YANG MERAGUKAN YANG BERBAU AJARAN BATINIYAH, FALSAFAH DAN MISTIK

a. Buku Hakikat Insan

Buku ini dikarang oleh Haji Ahmad Laksamana b Omar. Naskhah yang ada adalah dalam bentuk salinan fotokopi dari yang asal tanpa nama penerbit dan cetakan pertama pada tahun 1985.

Ringkasan Buku Hakikat Ihsan¹⁹

Ajaran Agama Taslim ini ialah tasawuf Wahdatul-Wujud atau *mysticism*. Asas pemikirannya ialah mengenal diri mengenal Allah. Mengenal diri kita berasal daripada Allah melalui saluran falsafah iminasi atau Martabat Tujuh. Maka diri batin manusia ialah Allah. Diri zahir manusia juga dari Nur Muhammad, juga melalui saluran iminasi Martabat Tujuh, Nur Muhamrnad daripada Allah, maka zahir manusia ialah Muhammad. Hasilnya: Kenallah dirimu hai manusia bahwa engkau ialah Allah + Muhammad.

Dengan menyedari hakikat ini maka konsep akidah dan menyembah Allah atau ibadat tidak wujud. Dua kalimah syahadat *Laa ilaaha illallaah Muharnmadur rasuulullaah* bukan lagi bermakna seperti yang difaham umum tapi ditafsirkan menurut bilangan kalimah dan kalimah itu menurut bilangan huruf. Tiap satu huruf itu diregukan dengan kalimah-kalimah istilah Mertabat Tujuh, kebatnian dan lain- lain yang bersangkutan. Demikian juga sembahyang lirma waktu tidak lagi wujud sebagai ibadah, malah semua

¹⁹ Bahagian ini dipertik dari buku *Kebatnian Agama Taslim* oleh Abdul Fattah Haron Ibrahim, terbitan Majlis Ugama Islam Singapura, 1989, ms 5 –19.

terkandung dalam kalimah (الْحُرُوف) Alhamdu (lima huruf). Tiap-tiap satu huruf digantung dengan kalimah-kalimah lain seperti yang dilakukan pada dua kalimah syahadat.

Selain daripada dua kalimah syahadat dan Alhamdu maka banyak lagi kalimah-kalimah dan ayat-ayat lain yang bersangkutan seperti:

Bismillaahir rahmaannir rahiim, Allaahu akbar, Allah, Muhammad,

Hatta ada yang menggunakan surah *Qul huallaahu ahad* hingga akhir menurut model pecahan huruf-huruf tersebut.

Semua tafsiran-tafsiran itu bermatlamatkan tak lain daripada menghapuskan semua konsep ibadat dan kewujudan Tuhan dan hamba kerana menegakkan bahwa engkau hai manusia tak lain daripada Allah + Muhammad. Bukan *Muhammaddur Rasuulullaah*. Tapi Muhammad yang mula asal jadi daripada Nur Allah bererti Muhammad itu juga Allah. Bermain dengan angka-angka dan huruf-huruf adalah dari ajaran batiniyah lebih-lebih lagi bila mentafsirkan bentuk tulisan م (mim) itu kepala, ح (ha') itu bahu, م (mim) itu ponggong, د (dal) itu kaki = Muhammad, maka inilah yang telah dilakukan oleh puak batiniyah di Asia barat di zaman Abbasiyah kira-kira seribu tahun yang lalu²⁰.

Ajaran Taslim ini menekankan zikir. Jangan pula difaham bahwa zikir ini ibadat tapi dalam usaha mengenal diri dan kelahiran diri melalui Mertabat Tujuh lalu dirasakan ada gangguan yang digelar nafsu menjadi hijab yang mesti dilawan untuk mengenal Allah.

Maka zikir mereka menepati meditasi dalam *mysticism*. Di antara zikir yang paling kemuncak ialah “*أه آه آه*” (ah ah ah) huruf pertama dan akhir daripada lafaz Al-Jallaalah (Allah) ditafsirkan (alif) itu adalah kemaluan lelaki dan “*ه*” (ha') itu berlubang alat kemaluan perempuan. Di waktu zikir di peringkat ini dilakukan kerja perisetubuhan dengan cara bebas seperti haiwan. Tafsiran mereka ialah kerana *ah ah* itu Zikir Ma'rifat Allah namanya. Sebab itu diambil "alif dan "ha" pada lafaz Allah itu yang tajjalli dari ahadiyah, wehdah, wahidiyah, alam arwah, alam misal, alam ajsam, alam insan. Alam misal (benih lelaki), alam ajsam (benih perempuan) keduanya datang dari Allah sebab itu diambil alif dan ha' simbol kemaluan lelaki dan perempuan.

(Jelas sekali bahwa ini adalah satu komplot sulit yang amat licin bertujuan mengejek dan menghina Islam).

Buku-buku *Hakikat Insan* ini mengandungi 23 bab yang boleh dibahagikan lagi kepada tujuh masalah yang paling pokok:

1. Bab 1 hingga 7 tentang tasawuf.
2. Bab 8 hingga 10 tentang dua kalimah syahadat.
3. Bab 11 hingga 13 tentang sembahyang

²⁰ Lihat Al-Ghazali, *Fadhah Al-Batiniyah*, Ad-Darul Qaumiah, Kahirah, 1964, ms 66 – 67.

4. Bab 14 tentang Mertabat Tujuh
5. Bab 15, 16 dan 20 tentang kejadian manusia.
6. Bab 17, 18, 19 tentang zikir.
7. Bab 22 orang mengaku diri Tuhan itu Fir'aun dan amalan yang tak mempunyai persambungan dengan Rasulullah itu batil dan karut semata-mata. (Tetapi saya dapati ajaran Mertabat Tujuh dan batiniah yang menjadi dasar dan keseluruhan isi buku *Hakikat Insan* ini sekali-kali bukanlah dari Rasulullah).

Dari Bab 1 Hingga 7

Bab 1 Teknologi Islam ialah perkara-perkara karamat dan mujizat

Dalam bab ini Haji Ahmad Laksamana membahagikan ilmu kepada tiga dengan menggunakan istilah-istilah ganjil iaitu ilmu qalam, ilmu ghaib, dan ilmu syahadat. Dalam bab ini ia memandangi kemajuan sains dan teknologi dunia moden sekarang, kerana itu ia menarik perhatian para pembaca kepada perkara-perkara mujizat dan karamat. Kerana menurutnya, inilah kemajuan sains teknologi Islam yang paling tinggi dan sempurna.

(Menurut pengertian biasa perkara-perkara mukjizat dan karamat tidak termasuk dalam ta'rif ilmu sains dan teknologi).

Bab 2 Ke arah memperolehi kelebihan seperti karamat dan mujizat itu hendaklah mengenal diri.

Dalam bab ini pengarangnya menegaskan bahwa sebelum Tuhan bernama Allah maka ZatNya bertajalli lalu lahir Nur Allah. Kemudian Nur Muhammad, Insan Kamil Mertabat aku engkau - engkau aku. Diri yang bernama Allah itulah diri batin manusia dan yang bernama Muhammad ialah diri zahir manusia. Tegasnya, manusia ialah Allah Muhammad. Iblis jadi pengacau sebab itu manusia perlu bukan kepada syariat sahaja tetapi juga tarekat, hakikat, dan ma'rifat. Matlarnat akhir ma'rifat ialah untuk kembali semula jadi Tuhan (halarnan 23). (Dalam kajian tasawuf tajalli Allah kepada tujuh mertabat digelar *tanazzul* (menurun) dan memerlukan syariat, tarekat, hakikat, ma'rifat itu *taraqqi* (menaik) kembali semula jadi Tuhan kerana datangnya dari Tuhan).

Bab 3 Bagaimana boleh kembali semula jadi Tuhan? Ambillah ilmu dari Wali-wali, Nabi-nabi, Rasul-rasul malah Tuhan sendiri.

Dalam bab ini pengarangnya membahagikan ilmu kepada ilmu biasa yang boleh dipelajari oleh semua manusia, ilmu yang boleh dipelajari oleh orang-orang tertentu dengan bergurukan para Wali, Nabi, dan Rasul, dan ilmu yang diajar oleh Tuhan sendiri bila sudah sampai ke mertabat Wali.

(Ini bernakna Nabi-nabi dan Rasul-rasul itu masih menyampaikan ajaran mereka kepada orang-orang tertentu sahaja. Maka bercanggahlah dengan pemahaman bahwa ajaran mereka berakhir dengan kewafatan mereka dari alam nyata dunia ini. Tuhan sendiri mengajar kepada orang-orang yang sampai ke mertabat Wali. Ini juga bercanggah dengan fahaman bahwa ajaran Tuhan itu melalui Nabi-nabi dan Rasul-rasul sahaja. Ini melibatkan masalah kasyaf dan pengasas-pengasas tarekat tasawuf hendakwa dapat ajaran dari Rasulullah bukan sahaja di waktu mimpi tapi juga di waktu jaga. Apa yang didakwa oleh Haji Ahrnad Laksamana adalah benar mencerminkan pemikiran tarekat-tarekat tasawuf).

Bab 4 Untuk kembali semula menjadi Tuhan dan memperolehi ilmu tersebut itu diperlukan melawan nafsu.

Menurut pengarangnya, nafsu itu ada tujuh iaitu *ammaarah, lawwaamah, mulhamah, muthmainnah, raadhiah, mardhiah dan kamaliah* dari kamaliah kepada ahadiyah (Tuhan, Mertabat Tujuh) menurun kepada wehdah, wahidiah, alam ruh, alam misal, alam ajsam, alam insan, insan ini ada tujuh nafsu pertama ammaarah meningkat kepada lawwaamah) dernikianlah seterusnya menaik kemudian menurun. (Pusingan Insan Kamil).

(Jelas membayangkan konsep wehdatul-wujud Mertabat Tujuh. Mertabat Tujuh ini bukan dari Al-Quran dan sunnah. Di samping itu dalam bab ini juga malah banyak di tempat-tempat lain dalam buku itu pemikiran pengarangnya amat terikat dengan perkara-perkara karamat dan mujizat).

Bab 5 Bila diri sudah suci sampai (ke nafsu kamaliah) maka bolehlah jadi Wali.

Jalan menjadi Wali, menurut pengarangnya, ialah dengan mengenal diri serta menjalankan latihan dan amalan di bawah bimbingan guru mursyid yang mesti dipatuhi dengan sepenuhnya. Nanti akan beroleh mimpi, nur, tajjalli daripada Tuhan, mata bashir (bashirah?) dapat melihat tujuh petala langit dan tujuh petala bumi.

Guru ghaib yang terdiri dari para Wali, Nabi-nabi, Rasul-rasul datang mengajar ilmu ladunni.

Fana' dengan Allah mulut terlatah kata Anal-haq. Sebenarnya sekarang, murid ini sudah jadi Wali besar dilawati oleh para tetamu yang terdiri daripada para wali, Nabi-nabi dan Rasul-rasul, secara hidup bukan mimpi, kata pengarang (halaman 59).

(Pengarangnya lagi-lagi menekankan para mu'jizat dan karamat, mulut masin dan sakti, barang dipinta barang boleh, barang kehendak barang jadi, katanya (halaman 61).

Bab 6 Agar dapat jadi wali besar ini pengarangnya suruh cari guru mursyid.

Dalam bab ini, pengarangnya memberi gambaran sifat guru mursyid yang agak detail yang merupakan guru mursyid itu ada tapi tidak diberitahu di mana dan apa nama mereka?²¹

(Bolehkah para ulama dan pihak yang berkuasa memperkenalkan tokoh-tokoh guru mursyid ini agar boleh dibuat pakar rujukan dalam ilmu tasawuf? Bolehkah mereka diberi tauliah seperti yang diberikan kepada guru-guru agama biasa?).

Sekian tinjauan yang didapati dari bab 1 hingga 6 yang berakhir menyuruh cari guru mursyid maka akan dapat bimbingan rohaniah untuk jadi wali dan menerima tetamu ghaib yang terdiri dari para wali, Nabi-nabi dan Rasul-rasul.

Dari bab 7 hingga akhir saya tiada dapati selain daripada pemikiran tasawuf Mertabat Tujuh dan tafsiran kalimah kepada huruf-huruf cara batiniyah. Maka adakah ini dari ajaran guru mursyid?

Bab 7 Mengenai Islam, Iman, Tauhid, Ma'rifat.

Menurut pengarangnya empat kalimah itu tak boleh bercerai tanggal bermula dengan Islam atau syariat kemuncaknya ma'rifat (mengenal Allah) dengan mengenal diri.

Digunakan beberapa ayat Al-Quran dan kata-kata istilah Mertabat Tujuh dan lain-lain bagi meregukan tiap-tiap huruf yang dipecahkan daripada satu kalimah.

Umpamanya kalimah, (Islam) jadi (alif) - Allah,, (sin)-salam, (lam)-lathif, (alif)-Adam, (mim) - Muhammad. Contohnya lagi kalimah (qalbi)- (qaf) – wujud, (lam) – ilmu, (ba') - nur, (ya') syuhud.

Wujud, nur, ilmu, syuhud, ialah istilah tafsiran Mertabat Tujuh atau tajjalli Zat Allah seperti yang dijelaskan oleh Hamzah Fanshurii dalam Syara'ul 'Aasyiqiin. Manakala pecahan kalimah kepada huruf adalah dari ajaran batiniyah.

Jelaslah bahwa dalam bab 7 ini hingga akhir buku itu terdapat ajaran batiniyah yang dicampur dengan tasawuf Mertabat Tujuh.

Bab 8 hingga 10 mengenai dua kalimah syahadat *Laa ilaaha illallaah Muhammadur rasulullaah*.

Menurut cara seperti tersebut di atas huruf-huruf dari dua kalimah syahadat inilah dipecah dan diregukan kalimah-kalimah istilah dan huraian angka yang bermacam-macam ragam. Contohnya *Laa ilaaha illallaah* ada 24 huruf sempena 24 jam sehari

²¹ Konsep guru mursyid ini saling tidak tumpah seperti konsep dakwaan puak Batiniyah ada "Imam Ghaib" guru mereka yang sebenar. Lihat *Al-Munqidz Minadh Dhalal*, Maktabah Al-Anglo Al-Misriyyah, Kahirah, 1962, ms 170-171

sernalam. Tanpa disedarinya bahwa kalimah “ مُحَمَّد ” (Muhammad) dan “ اِلَّا ” (illaa) itu ada *syaddah* jadi dua huruf bertambah, maka kalimah Muhammad ada lima huruf, dan *illaa* ada empat maka jadilah jumlahnya 26 bukan 24.

Yang amat jelas ajaran batiniah ialah pada kalimah Muhammad dikatakan itulah diri zahir manusia, (mim) - kepala, (ha') - bahu, (mim) - ponggong, (dal) - kaki. (Lihat kitab *Fadhaaih Albathiniah* tentang batiniah oleh Imam Al-Ghazali).

Di atas telah saya jelaskan bahwa Allah itu diri batin manusia. Muhammad itu diri zahir manusia. Tegasnya manusia itu ialah Allah Muhammad, maka dalam bab ini dilukiskan kalimah “Allah” bertindih dengan kalimah “Muhammad” (halaman 99), dimaksudkan diri manusia zahir dan batin ialah Allah + Muhammad diliputi dalam tujuh mertabat ahadiyah wehdah, wahidiyah, alam arwah, alam misal, alam ajsam dan alam insan.

Oleh kerana Allah dan Muhammad itu pada hakikatnya satu jua iaitu diri manusia- diri zahir dan diri batin - maka hendaklah dibaca *Laa ilaaha illallaah Muhammadur asuulullaah* dengan satu nafas bersambung tak boleh putus.

Maka tiada yang disembah dan tiada penyembah dan sembahyang itu tak lain daripada penyaksian diri kita sendiri pembawa dan pemegang rahsia Allah (halaman 93). Ialu dibawahnya Hadits *Al-insaanu sirrii wa ana sirruhu* (bukan hadits).

Mulai dari ahadiyah hingga alam insan ada tujuh mertabat kemudian dari sini maka nafsu ammaarah hingga nafsu kamaliah juga tujuh, sampai balik kepada ahadiyah (Allah) inilah tafsiran *Innaa Lillaahi Wa Inna Ilaihi Raajiuun*. Halaman 135.

(Saya berpendapat tafsir ini benar jika konsep Mertabat Tujuh itu benar, jika salah, maka tafsir ini pun salah. Sebelum menyalahkan tafsiran ini, cubalah pastikan lebih dahulu apakah hukum akidah Mertabat Tujuh dalam Islam?).

Bab 11 hingga 13 - Hakikat Sembahyang.

Ahrnad Laksarnana menolak konsep sembahyang dengan erti sembah yang Maha Esa iaitu Allah Ta'ala. Menurut fahamannya jika demikian maka Allah itu ada di hadapan kita. Maka perbuatan seperti ini tiadalah beza dengan agama-agama yang lain yang menyembah berhala dan fahaman jahiliah. Bagi Haji Ahmad Laksamana shalat atau sembahyang itu membolehkan kita berdiri menyaksikan diri kita sendiri. Diri batin kita Allah dan zahir kita Muhammad penanggung rahsia Allah. Sebab itu, bagi Haji Ahmad Laksamana, tiada penyembahan dan tiada yang disembah “ لاَ عَابِدُونَ لَآءَا بَدُونَ ” (*Laa Aa'bidun Wa Laa Ma'bud*) bila sampai kepada ayat *iyyaakana'budu* dalam surah Fatihah diertikan "kepadanya dibaktikan" (halaman 280) erti sebenar ialah "Akan dikau kami sembah" demikian juga “sembahlah Allah seolah-olah engkau melihatnya jika engkau tiada melihatnya tapi dia lihat engkau" sama sekali tak wujud dalam Ajaran Taslim Ahrnad laksarnana ini. Dengan itu maka konsep "ibadat" tak wujud dalam Ajaran Taslim seperti yang ditonjol oleh Haji Ahrnad Laksarnana ini.

Di antara kalimah-kalimah dan ayat-ayat yang menjadi sasaran pecah kepada huruf-huruf yang tiap-tiap satunya diregukan dengan kalimah atau ayat lain yang kononnya inilah erti sembahyang menurut cara tasawuf ialah kalimah *Al-Hamdu, Allahu Akbar, Al-Hamdulillaahi rabbil 'aalamin, Muhammad, Adam, ah* contohnya seperti:
 - Hakikat syahadat, lam - hakikat sembahyang, - hakikat puasa, - hakikat zakat, - hakikat haji. Atau - Allah, - api, - angin, - air, - tanah. Dan banyak lagi jika disusun sekali lagi kelihatan seperti berikut:

	(Alif)	(Lam)	(Ha)	(Mim)	(Dal)
1 -	Allah	api	angin	air	tanah
2 -	syahadat	sembahyang	puasa	zakat	haji
3 -	subuh	zuhur	asar	maghrib	isyak
4 -	Allah	Muhammad	Rasul	Allah	Dalil (dan lain-lain)

Dari tafsiran ini bernakna sembahyang lima waktu terletak dalam huruf "alhamdu" yang lima dengan itu meliputi keseluruhan apa sahaja yang boleh dibilang lima atau dicuba cukupkan jadi lima. Seperti (1) contoh di atas Allah - api - angin - air - tanah empat anasir alam disamakan dengan Allah. Contoh (2) syahadat - sembahyang - puasa - zakat - haji iaitu rukun Islam yang lima sudah terkandung dalam alhamdu. Sebab itu dalam Agama Taslim tiada menyentuh hakikat puasa zakat dan haji kerana semuanya itu sudah terkandung dalam "alhamdu".

Contoh (3) subuh - zuhur - asar - maghrib - isyak semuanya sudah terkandung dalam "alhamdu" juga, sebab itu dalam Agama Taslim tiada penekanan kepada menunaikan sembahyang dalam waktunya kerana semuanya itu sudah terkandung dalam "alhamdu".

Contoh (4) lebih lucu lagi kerana tiap-tiap satu daripada lafaz Allah - Muhammad - Rasul - Allah dalil dipecahkan kepada huruf lalu ditafsirkan semula menurut kaedah "alhamdu" (lihat halaman 161 hingga 165). Seperti tersebut di atas tiada dilupakan bila sampai kepada Muhammad dilukisnya huruf dalam bentuk - kepala, - bahu, - ponggong, - kaki.

Contohnya lagi, rukun 13 dalam sembahyang ialah 13 sendi besar dalam badan manusia tegasnya, sembahyang itu ialah manusia sendiri seperti yang dijelaskan bahwa dalam Agama Taslim seperti yang diajar oleh Haji Ahmad Laksamana dalam bukunya *Hakikat Insan* ini bahwa sembahyang itu membolehkan kita berdiri menyaksikan diri kita sendiri (tiada 'abid dan tiada ma'bud). Dia menuduh bahwa sembahyang ulama dan muslimin semuanya tak betul. Cara sembahyang yang betul kerana Nabi sendiri datang mengajarnya disaksikan oleh Nabi Yusuf, Wali Quthub, Abdul Qadir Jailani, dan imam Syafi'i serta disahkan oleh Nabi Hidir dan peraku oleh guru mursyidnya (lihat bab 12).

Erti sembahyang menurut Haji Laksamana ialah penyaksian ke atas diri kita sendiri dan ini perlu dilakukan setiap saat maka itulah namanya *shalat daim*, katanya, itulah amalan

Rasul-rasul, Nabi-nabi, Wali, dan *khawafil hawwah* (kbawaasul-kbawas?) maka shalat daim ini ada kaitan dengan zikir nafas sila lihat bahagian zikir.

(Catatan: Menafikan ada 'abid dan ma'bud dan ibadah terang-terang menyalahi nas Al-Quran dan sunnah).

Martabat Tujuh

Demikian didapati bagaimana Agama Taslim Haji Ahmad Laksamana menghuraikan pengertian dua kalimah syahadat dan sembahyang lima waktu. Huraian-huraian tersebut berdasarkan kalimah-kalimah dan ayat-ayat Al-Quran yang tertentu yang dipecah-pecahkan jadi huruf. Maka inilah perbuatan puak batiniah yang terkeluar dari Islam.

Di antara kalimah yang menjadi pilihan itu ialah "Islam dan Iman (tapi tiada ihsan). Menyentuh rukun Islam hanya terbatas kepada syahadah dan sembahyang dan dalam sembahyang terkandung segala-galanya dalam "Al-Hamdu" termasuklah puasa, zakat dan haji. Sama sekali tiada huraian mengenai rukun iman yang enam. Manakala kalimah "ihsan" yang menjadi salah satu punca huraian *Tasawuf Sunni* sama sekali tiada disentuh.

Dengan selesainya perbincangan syahadah dan sembahyang seperti tersebut maka Haji Ahmad Laksamana yang menyondolkan ajaran Agama Taslim ini memulakan pula perbincangan mengenai Martabat Tujuh pada bab 14 dari bukunya itu.

Pemikiran asas dalam ajaran Martabat Tujuh ialah kesatuan segala yang ada atau (*Wahdatul-Wujud*) yang tiada awal dan akhir malah dialah awal dan dialah akhir pada hakikatnya. Jika dernikian bagaimana ditafsirkan gejala-gejala *mazhahir* yang banyak ini? Maka dijawabnya bahwa, itu hanyalah ada susunan yang biasanya disebut tujuh lapis atau Mertabat Tujuh pada anggapan kita bukan pada hakikat yang sebenarnya. Maka lahirlah dalam perbincangan ini konsep menurun dan menaik yang merupakan pusingan yang satu. Seperti tersebut di atas pusingan menurun ialah daripada ahadiah, wahdiah, wahidiah, alam arwah, alam misal, alam ajsarn, alam insan. Insan digoda iblis dan nafsu yang merupakan hijab tak lagi ingat dan kenal akan "ahadiah" nya maka perlu dilawani nafsu ini menaik (*Taraqqi*) semula bermula dari ammarah, naik meningkatkan kepada *Lawwaamah*, *Mulhamah*, *Muthmainmah*, *Radhiah*, *Mardhiah* dan *Kamaliah* barulah sampai dan kenal *Ahadiah* (Tuhan atau mutlak) yang menurun balik kepada *Wahdah*, *Wahidiah*, *Alam Arwah*, demikianlah seterusnya berbalik semula pusingan itu menurut perhitungan kita jua. Bukan hakikat yang sebenar.

Makrifat Allah tak mungkin tercapai tanpa kembali semula menjadi Tuhan (*Ahadiah*) iaitu mertabat asal diri. Sebab itu tugas kita ialah menyuci diri "*Taraqqi*" semula hingga sampai kepada *Martabat Ahadiah* itu. Yang perlu dicucikan itu ialah nafsu yang menjadi hijab.

Dalam proses *tanazzul* itu menunjukkan alam dan diri kita ini daripada ada kepada ada (bukannya daripada tiada kepada ada) yang diumpamakan "semacam pokok besar yang masih di dalam biji" (halaman 196) bagi Ajaran Taslim bahwa alam misal ialah bapa disebut *Wadi, Mazi, Mani*, masuk benih itu ke rahim ibu digelar *Manikam* atau *Alam Ajsam* maka lahirlah seorang manusia atau alam insan. Oleh kerana *Alam Insan* dari *Alam Ajsam*, *Alam Ajsam* dari *Alam Rnisal*, *Alam Misal* dari *Alam Arwah*, *Alam Arwah* dari *Wahidiah*, *Wahidiah* dari *Wahdah*, *Wahdah* dari *Ahadiah* Tuhan atau mutlak maka itulah dimaksudkan oleh Haji Ahmad Laksamana bahwa diri kita mengandung diri Tuhan, diri kita dengan diri Tuhan adalah satu, diri kita itulah Tuhan, dan diri Tuhan itu adalah kita (halaman 220).

Dalam membincangkan ajaran Mertabat Tujuh ini ada beberapa perkara yang perlu diawasi:

1. Dalil dari Al-Quran dan Hadits tidak ada. Haji Ahmad Laksamana buat-buat dalil dari surah *Qul huwallaahu ahad* seperti berikut maka didapati surah *Qul huwallaahu* hingga akhir memang betul tetapi madlulnya iaitu pemikiran Mertabat Tujuh tak ada kena mengena dengan surah ini. Lihatlah cara pendalilannya yang salah. Huruf-huruf yang dipecahkan dari ayat dan kalimah surah ini diregukan dengan kalimah-kalimah lain sebagai erti menurut kaedah yang sama seperti yang dilakukan ke atas *alhamdu* dan *seumpamanya*.
2. Tidak semestinya tujuh, tapi ada yang membilanginya sampai empat puluh seperti yang dilakukan oleh Abdul Karim Aljili dan ada pula yang membataskan setakat lima sahaja seperti yang dibuat oleh Syamsyuddin Pasai yang sealiran dengan Harnzah Fanshurii. Manakala Hamzah Fanshurii pula menggunakan istilah lain iaitu *Laa Ta'aiyyun*, *Ta'aiyyun Awal* terbahagi kepada *Wujud*, *Nur*, *Ilrnu*, *Syuhud*, dari sini timbul lagi istilah-istilah lain seperti *Tajallii*, *Shuarul'ilmiah*, *Haqiqatul-Asya'*, *Ruh Idhafi*, *A'yan Tsabitah*, *Ta'aiyyun-Tsanii*, *Ta'ayyun-Tsalits* dan seterusnya. Istilah-istilah seperti ini bertaburan dalam keseluruhan buku *Hakikat Insan* oleh Haji Ahrnad Laksamana. Orang-orang yang belum membiasakan perhatian dalam bidang ini, tentu mendapat kesukaran dalam memahaminya.
3. Berasaskan teori pusingan "*Tanazzul - Taraqqi*" tujuh nafsu menaik dan tujuh martabat menurun maka Haji Ahmad Laksamana beralil dengan ayat "*Innaa lillaahi wa inna ilaihi raaji'uun*" yang diberi erti "sesungguhnya dirimu itu Allah (Tuhan asal dirimu) dan hendaklah kamu pulang menjadi Tuhan kembali. Perlu saya ulangi di sini bahwa pada fahaman saya, kalau mahu salahkan tafsiran Haji Ahmad Laksamana ini, hendaklah salahkan falsafah Mertabat Tujuh itu terlebih dahulu. Jika Mertabat Tujuh itu betul, tafsirannya pun betul, jika Mertabat Tujuh itu salah dari segi akidah Islam, maka tafsirannya pun salah.
4. Walau bagaimanapun, pemikiran Mertabat Tujuh ini terdapat di dalam kitab-kitab Tasawuf seperti di dalam kitab risalah *Asraaruddin* di tepi kitab *Miftaahul-*

jannah, Kitab Siarus-saalikin dan Kitab Ad-Durrunnafis, kitab-kitab Tasawuf dari jenis ini menjadi cacat jika Mertabat Tujuh itu disalahkan.

5. Martabat Tujuh rnenjelaskan bahwa alam dan manusia ini terkeluar (*As-Sudur Al-Inbitsaq - Emanation*) dari Allah bukannya dijadikan dari tiada kepada ada. Malah dari ada kepada ada, seperti adanya pokok dengan adanya benih, adanya ombak dengan adanya laut. Maka ini bercanggah dengan zahir nas Al-Quran.

Bab 15, 16, 20 nyawa dan jasad, maut, kejadian manusia.

Setelah selesai pembentangan konsep Mertabat Tujuh, dan di mana letaknya rmanusia dalam susunan itu maka dibahagian ini kita dapati Haji Ahmad Laksamana menekankan tentang manusia dari sudut nyawa dan jasadnya, matinya dan kejadiannya.

Menurut Ajaran Taslim ini manusia itu terikat dengan kaedah Martabat Tujuh *digelar Alam Insan*. Datangnya manusia dari ibunya yang digelar manikam - *Alam Ajsam* yang ditanam ke dalam rahimnya mazi, wadi, dan mani si bapa - *Alam Misal*. (*Pentafsiran Alam Misal, Alam Ajsam, Alam Insan* di sini menyeleweng dari pengertian asal).

Agama Taslim membicarakan nyawa dan jasad. Dimaksudkan dengan nyawa ialah pernafasan turun - naik hisap dan hembus udara yang diberi nama *Nafas* jika di mulut, *Anfus* di hidung, *Tanaffus* di belakang kepala di antara dua telinga dan *Nufus* jika di jantung. Serta dilengkapi pula dengan zikir iaitu (Allah Allah, huhu, hu Allah, Allah hu, aa ii uu dan 'aa', 'ii', 'uu', ah). Bahagian yang akhir ini digelar zikir makrifat.

Penjelasan nyawa dan jasad dalam bab ini sekali lagi diulangi perkara *Tanazzul* dari *Ahadiah - Nur Allah, Nur Muhammad - Adam - Wadi - Mazi- Mani - Manikam* berakhir dengan jasad dan nyawa dan ruh maka itulah "Muhammad". Di sini Haji Ahmad Laksamana lukis huruf "Mim" "Ha" "Mim" "Dal" berupa "Mim" kepala, "Ha" bahu, "Mim" ponggong, dan - "Dal" kaki. "Dimaksudkan kita semua manusia ialah Muhammad kerana kita semua ada kepala, bahu, ponggong dan kaki."

Tiap-tiap manusia akan mati yang ta'rifkan "kembali diri rahsia kita kepada Allah Ta'ala" menurut Haji Ahmad Laksamana, orang-orang wali dan arif billah dapat mengetahui lima kali dalam masa setahun sebelum mati iaitu dalam tempoh setahun, sebelum enam (6) bulan, sebelum 100 hari, 40 hari, dan 70 hari dengan 9 jenis gerak-gerak di bahagian tertentu badan seseorang.

(Firman Allah taala

ولا تدري نفس بأي ارض تموت

Dan tiada seorang pun yang dapat mengetahui di bumi mana ia akan mati (Luqman: 34).

Bandingkan ayat ini dengan apa yang diperkatakan oleh Haji Ahmad Laksamana.

Bab 20 Haji Ahmad Laksamana membincangkan hakikat kejadian manusia.

Oleh kerana ianya menolak konsep penyembahan Allah atau ibadat, *Laa 'Aabid*, dan *Laa Ma'bud* maka apakala ia datangkan ayat

“*Wa Ma Khalaqtul Jinna Wal Insa Illa Li yakbuduni*” (Az-Zariat : 56)

diberi erti tidakku jadikan jin dan manusia kecuali untuk berbakti (mengenal diri) (halaman 303) erti sebenar ialah “*dan tidakku menciptakan jin dan manusia melainkan supaya mereka menyembahku.*”

(Dengan ini jelas bahwa Haji Ahmad Laksamana menolak konsep ibadat sebagaimana yang terdapat dalam Al-Quran. Tegasnya, Haji Ahmad Laksamana menyalahi Al-Quran).

Dalam bab 20 ini Haji Ahmad Laksamana jadikan *Bismillaahir Rahmanirrahiim* sebagai sasaran pemecahan ayat dan kalimah kepada huruf-huruf yang digantung ertinya dengan kalimah lain seperti yang dilakukan ke atas kalimah Islam, alhamdu dan lain-lain yang telah disentuh di awal penulisan ini. Di antara perkara yang menarik perhatian:

1. Sebelum (ba') pada “Bismillahirrahmanirrahim” “ا” (Alif) dan huruf “ح” “Ha” jadi yang digelarnya *alif batin* maka jadilah tambahan ke atas ayat Al-Quran dengan satu huruf alif itu. Jika ada orang yang membilang huruf itu 19 maka sekarang bertambah satu jadi 20.
2. Dengan 20 huruf *basmalah* ini maka dilengkapi dengan 20 sifat Allah (sifat dua puluh). Atau dicampur sebahagian dari sifat dua puluh dengan istilah-istilah Mertabat Tujuh, atau nama-nama alam dan bermacam ragam lagi.
3. Yang paling mengerikan ialah huruf “ا” (alif) dan huruf “ح” (ha) yang terdapat dalam “Bismillahirrahmanirrahim” maka bagi Ahmad Laksamana, “ا” (alif) itu zakar (kemaluan lelaki) manakala “ح” (ha) itu dilukis dengan berlubang di tengah ialah faraj (kemaluan perempuan).

(Bahasa lucah dan mencarut Haji Ahmad Laksamana gunakan. Lihat halaman 305-307).

Apakala zakar ingatkan faraj ia pun bangun jadi keras dan tegang dikiaskan demikianlah jua bila ingatkan Allah. Di saat ini zikirnya “اح” (ah) yang dinamakan zikir ma'rifat. Perhatikan bahawa zikir ma'rifat ini terdiri dari (alif dan ha')- simbol kepada kemaluan lelaki bertemu dengan kemaluan perempuan.

Menurut beritanya apakala puak taslim ini berkumpul dan berzikir yang dilakukan dengan *Laa ilaa ha illallaah*, bertukar jadi “اللهو”, “اللهو”, “اللهو”, “اللهو” (huhu, Allah hu, hu Allah), kemudian beralih kepada (aa aa ii uu dan 'ii', 'uu', ah) (zikir makrifat namanya) maka di waktu itulah gurunya menarik perempuan di majlis zikir itu dan melakukan persetubuhan. Seperti yang digambarkan dalam drama *Ikhtilaf Tayangan RTM* pada malam Maulid Nabi Rabu 12 Rabiul Awwal bersamaan 4 November 1987, pada hemat saya memanglah benar ada berlaku begitu. Atau semua di majlis itu melakukan persetubuhan dan jika mengandung, dapat anak saleh.

4. Mengejek dan menghina Islam amat jelas dalam ajaran agama Haji Ahmad Laksamana ini. Apakala tulisan lafaz aljalalah itu diambil alif dan ha' dengan tafsir seperti tersebut di atas.

Bab 17 *Zikir nafas* ada kaitan dengan sembahyang sentiasa (*Salat Daim*) seperti yang telah dibincangkan.

Menurut Haji Ahmad Laksamana, seperti yang telah diterangkan, nyawa terbahagi kepada nafas jika dari mulut, anfus dari hidung, tanaffus dari belakang kepala di antara dua telinga, dan nufus jika di jantung. Zikirnya seperti tersebut di atas di mula dengan *laa ilaa ha illaah* melarat kepada *huhu, Allah hu, hu Allah, Aa Ii Uu* dan 'Aa, 'Ii, 'Uu, Ah, proses pernafasan nyawa ini turun hingga pusat, dan naik hingga ke ubun-ubun, dilakukan demikian sepanjang pernafasan, sentiasa selagi kita bernafas. Sentiasa inilah dinamakan sembahyang sentiasa (shalat daim).

Agama Taslim pengaruh dari Tasawuf. Dalam Tasawuf, zikir itu dianggap lebih penting daripada mengerjakan sembahyang itu sendiri. Setelah segala bilangan yang bersangkutan dengan bacaan dan kelakuan sembahyang itu diletakkan pada diri manusia seperti rukun 13 diertikan dengan 13 sendi besar manusia (halaman 151).

Tujuh ayat Al-Fatihah dengan 7 hari seminggu, dan sekian banyak perkara-perkara terletak dalam “alhamdu” maka sebenarnya shalat atau sembahyang itu bukan lagi dengan cara kebiasaan yang dilakukan oleh ummat Islam selama ini tetapi sembahyang itu ialah diri manusia itu sendiri dikatakan itulah Allah + Muhammad: diri batin Allah, diri zahir Muhammad. Maka hilanglah ibadat sembahyang biasa yang diketahui selama ini dan ditinggallah sembahyang itu tak lain manusia (Allah + Muhammad) itu sendiri yang bernyawa sentiasa maka lengkapkanlah nyawa atau bernafas itu dengan zikir seperti tersebut di atas maka sentiasalah orang itu bersembahyang.

Ulasan²²

²² Berikut pula adalah ulasan ringkas pembentang kertas ini

1. Pengajaran Taslim ini nyatalah tidak berdasarkan Al-Quran dan hadits Rasul yang sahih sekali pun ada kalanya mereka mendatangkan ayat-ayat Al-Quran sebagai sandaran bagi kebenaran ajarannya, tetapi hakikatnya semata mengabui mata sahaja yang sebenarnya pengajaran itu semata-mata berdasarkan fikiran fahaman tafsiran Haji Muhammad Matahari mengikut yang sesuai dengan kehendak dan kemahuannya.
2. Pengajaran ini adalah timbul dan salah 'amal atau tersalah sarung yang menganggap cara ratib atau 'amalan tarikat-tarikat yang melampau itu sebagai jalan yang benar menuju keredzaan Allah dan mencapai darjat yang tinggi, sehingga dengannya menimbulkan angan-angan yang berbagai-bagai rekaan yang karut terkeluar daripada dasar agama Islam yang benar.
3. Puak Taslim ini telah terkeluar dan golongan Islam atau mereka bukan lagi beragama Islam, mereka menjadi murtad sekali pun kononnya bermacam-macam putar belit pengajarannya dengan menggunakan dalil, alasan-alasan daripada ayat Al-Quran Mereka telah menyalahi akidah rukun iman yang sebenar, iaitu dengan mempercayai Tuhan berumahtangga dalam tubuh seorang manusia, (*Lailaha*) istana tuhan (*illallah*) roh Tuhan, seterusnya mereka mengingkari fardhu sembahyang lima waktu, tidak boleh dilakukan kerana Allah bersatu dengan badan kita, dan menganggap fardhu sembahyang itu rekaan ulamak bukan perintah Tuhan, dengan itu jelaslah mereka telah mengingkari Al-Quran kitab suci yang menjadi rukun iman yang wajib dipercayai.
4. Lebih tegas lagi mereka tak percaya kepada Al-Quran dan menganggap Al-Quran itu bukanlah Al-Quran yang sebenarnya, Al-Quran mereka yang sebenarnya ialah di dalam diri rasul mereka yang ada di Bayan Lepas, Pulau Pinang, ini terang-terang menyalahi rukun iman.
5. Upacara menjadi seorang Taslim itu adadah rekaan semata-mata yang bererti itu ialah satu cara agama baru bukan agama Islam yang disampaikan oleh junjungan besar Muhamad s. a. w., lebih-lebih lagi dengan mengucap kalimah baru mengaku diri menjadi (*Lailaha illa hu -tidak aku melainkan dia - tuhan*), ini sahaja telah cukup mengeluarkan puak ini dari golongan Islam kerana mereka mempunyai syahadah yang lain dan telah mengaku Tuhan, mengingkari fardhu-fardhu ibadat yang terang kebenarannya dan Al-Quran dan hadits Nabi yang sahih.

Selari dengan apa yang dinyatakan di atas, Prof. Madya Abdul Fatah Haron Ibrahim menulis

“Seperti yang telah diterangkan, Ajaran Taslim menyelewengkan sembahyang lima waktu kepada 'Al-Hamdu' tiada ibadat, abid dan ma'bud kemudian menonjolkan zikir. Manakala tilawah Al-Al-Quran dan nawafil jauh sekali. Sikap yang sama kelihatan pada setengah tarekat tasawuf yang ditonjolkan ialah zikirnya dan wiridnya manakala sembahyang fardhu, nawafil dan tilawah Al-Al-Quran tiada ditekankan.”²²

6. Ajaran Taslim lebih mencerminkan ajaran mysticism bukan Islam. Ajarannya mirip ajaran transcendent mysticism yang kononnya dengan meditasi boleh menenangkan jiwa dari kelim kabut dan ketegangan hidup kebendaan moden sekarang.

Hakikatnya meditasi tidak mungkin dapat menandingi solat dan tilawah Al-Al-Quran. Meditasi hanya dilakukan sekali-sekala, bila perlu oleh orang-orang tertentu tetapi solat dalam Islam umum kepada semua Muslimin tidak kira kecil, besar, tua atau muda. Solat didahului dengan wuduk. Di antara hikmah berwuduk ialah dengan membasuhkan air ke muka dan anggota-anggota tertentu boleh menenangkan fikiran dan mengendurkan ketegangan. Orang Islam wajib melakukan ini setiap kali hendak bersolat walau pun dalam keadaan sibuk sekali pun. Oleh itu, di manakah letaknya meditasi bila dibandingkan dengan solat dalam Islam²².

1. Haji Ahmad Laksamana mengembangkan Agama Taslim yang menolak konsep 'Ubudiah.
2. Segala takwilan-takwilan atau simbol seperti "Alif", "Lam", "Lam", "Ha" "Allah", "Mim", "Ha", "Mim", "Dal" "Muhammad" dan "Al-Hamdu" dan lain-lain itu jelaslah dari angkara puak batiniyah menjelek-jelek amalan ibadat Islam.
3. Manakala istilah *Nafas*, *Nufus*, *Anfus* dan *Tanaffus* itu adalah dari *Wirid Hidayat Jati*. Manakata *Mani*, *Mazi*, *Wadi*, dan *Manikam* daripada istilah *Sirat Wirid*. Keduanya ini dari aliran kebatinan jawa.

Dengan itu terbukti bahwa sepanjang perbincangan ini bahwa Agama Taslim mengandungi unsur-unsur Tasawuf Wahdatul-Wujud, Martabat Tujuh, tafsiran huruf cara batiniyah dan amalan Kebatinan Jawa.

Dari tinjauan ini saya dapati gerakan Agama Taslim mempunyai pertalian yang rapat dan berakar umbi yang jauh datangnya daripada:

7. Ajaran Taslim sebenarnya berteraskan fahaman Martabat Tujuh yang mengemukakan konsep Hulul dan Tajalli. Rujuk bahagian perbahasan mengenai buku Hakikat Insan dan perbahasan mengenai Fahaman Martabat Tujuh.

Firman Allah taala

واقم الصلاة ان الصلاة تنهى عن الفحشاء والمنكر ولذكر الله أكبر

"Dan dirikanlah solat (untuk mengingati Aku). Sesungguhnya solat itu mencegah keburukan dan kemunkaran dan sesungguhnya zikirullah itu lebih besar dan Allah mengetahui apa yang kamu lakukan." (Al-Ankabut : 45)

Para mufassir telah mentafsirkan erti zikirullah dalam ayat ini ialah solat bukan zikir biasa.

8. Ajaran Taslim boleh dianggap sebagai antara induk bagi pelbagai ajaran sesat yang dikesan di Singapura. Dalam laporan-laporan yang diterima berkaitan dengan pelbagai ajaran sesat di dapati bahawa ia mempunyai kaitan dengan Ajaran Taslim. Yang berbeza hanyalah pada nama. Antara ajaran-ajaran berkenaan ialah ajaran Tarikatul Islam, Hakikat Sembahyang, Martabat Tujuh, Mengenal Diri dan Ilmu Makrifat. Ini berkemungkinan dilakukan secara sengaja dengan tujuan mengaburkan masyarakat khususnya setelah pendedahan akan kebatilan Ajaran Taslim.
9. Ajaran Taslim juga boleh dianggap sebagai jambatan bagi penerapan unsur-unsur ajaran batiniyah dan wahdatul wujud di Singapura ini. Ajaran batiniyah dan wahdatul wujud telah lama wujud dalam dunia Islam. Jambatan utama perkembangannya, pada kebiasaannya, ialah melalui tarekat-tarekat yang menyeleweng, kitab-kitab tasawuf seperti Ad-Dur An-Nafis dan Kamarul Huda dan tokoh-tokoh seperti Hamzah Fansuri.

Ajaran-ajaran ini telah ditentang pada masa dahulu. Data-data menunjukkan kemunculan Ajaran Taslim di awal-awal abad ke 20 memainkan peranan untuk menghidupkan dan menyebarkan semula ajaran-ajaran ini.

1. Ilmu Tasawuf Wehdatul-Wujud Mertabat Tujuh.
2. Ajaran puak batiniyah yang dianggap terkeluar dari Islam.
3. Kebatinan Jawa.

Tegasnya, Agama Taslim ada mempunyai pertailan dengan seberang laut dan dengan sejarah pertarungan akidah ummat Islam yang timbul dari abad permulaan Islam lagi.

Dalam sejarah perkembangan akidah, kita dapati tokoh-tokoh Ahli Sunnah seperti

- Al-Ghazali dengan bukunya *An-Munqidz min adh-dhalal*, *Fadhaih al-Bathiniyah*, *Al-Qisthas Al-Mustaqim*;
- Asy-Syah-astani dengan *Al-Milal Wan Niha*;
- Al-'Iraqi Al-Hanafi dengan *Al-Firaqu Al-Muftariqa*;
- Al-Baghdadi dengan *Al-Farqu Baina Firaq*;
- Al-Qadhi Abdul Jabbar Al-Hamazani dengan *Tatsbitu Dalail An-Nubuwwah*.
- Al-Hammadi dengan *Kasyafu Asrari Al-Bathiniyah*

berterusan hingga ke zaman moden seperti

- Jamal Al-Afghani, Muhammad Abduh dengan *Ar-Raddu 'Ala Ad-Dhahriyyin*;
- Professor Rasyidi dengan *Islam Dan Kebatinan*;
- Hamka dengan *Sejarah Kebatinan Di Indonesia*

telah mendedah malah melancarkan tentangan hebat dan memberitahu kaum muslimin tentang bahaya gerakan Batiniyah ini. Demikian contoh beberapa tokoh Ahli Sunnah dalam melancarkan tentangan ke atas aliran Ismailiah Batiniyah.

Tapi puak-puak Ismailiah Batiniyah tidak kurang pula menegakkan aliran mereka dengan mengeluarkan kitab masing-masing seperti

- As-Sajastaani dengan bukunya *Al-Yanabi*';
- Al-Qadhi an-Nu'man dengan *Da'a'im Al-Islam*; dan *Asas At-Takwil*;
- Al-Karmani dengan *Rahah Al-Aqli* dan *Ar-Risalah Ad-Durriyyah*

dan banyak lagi hingga sampai ke zaman moden ini di Asia Barat lahir tokoh intelek Isma'iliyah Batiniah seperti

- Doktor Mustafa Ghalib dengan bukunya *A'lam Al- Isma'iliyah dan Tarikh Al-Harakat Al-Bathiniah*.

Di antara perkara yang menarik di sini ialah semua dalam buku *A'lam Al-Isma'iliyah* (tokoh-tokoh Isma'iliyah) disenaraikan nama-nama tokoh lebih dari seratus tiga puluh orang ramainya mulai daripada Ali bin Abi Thalib hingga kepada Ali bin Hasan Shah Agha Khan zaman moden sekarang, maka di antara mereka ini termasuklah beberapa tokoh sufi seperti Ibnu 'Arabi, Jalaluddin Ar-Rumi, Fariduddin Al-'Aththar yang dikenali dan dibaca karangan-karangan mereka di Malaysia ini.

Mustaffa Ghalib menjelaskan mengapa tokoh-tokoh sufi ini ialah juga tokoh Ismailiah Batiniah?

Jawabnya ialah kerana ada kaitan rapat di sebabkan falsafah tasawuf itu memasukkan ajaran Batiniah Isma'iliyah ke dalam pemikiran mereka (*A'lam Al-Isma'iliyah*) (halaman 505)²³.

Kaitan yang rapat juga boleh dilihat dengan jelas dalam ajaran kebatinan Jawa yang merupakan unsur-unsur peninggalan Hindu - Buddha bercampur dengan Tasawuf Wehdatul Wujud Mertabat Tujuh.

Dengan ini tidaklah menghairankan kita apakala di dapati bahwa ajaran Agama Taslim tak lain daripada campuran dari kebatinan Jawa, Tasawuf Mertabat Tujuh dan Batiniah.

Fatwa Mengenai Buku Hakikat Insan & Tindakan

Majlis Ugama Islam Singapura telah memfatwakan seperti berikut

“Setelah meneliti buku tersebut (Hakikat Insan), JK Fatwa berpendapat bahawa buku "Hakikat Insan" ini menyesatkan. Ia tidak harus diedarkan kerana banyak mudaratnya dan tidak ada manfaatnya²⁴.”

Di Malaysia fatwa-fatwa berikut telah dikeluarkan mengenai buku *Hakikat Insan*²⁵

1. *Mesyuarat Jamaah Ulama Majlis Ugama Kelantan telah memfatwakan pada 5.6.86 dan Warta 3/7/86*

²³ Lihat Mustafa Ghalib, *A'alam Al-Isma'iliyah*, Beirut, Darul Yaqazah, 1964.

²⁴ Lihat *Fatwa MUIS*, jld 2, Fatwa no. 44.

²⁵ Lihat halaman web Pusat Islam Malaysia di www.islam.gov.my/sesat/BM/

No.255 bahawa ajaran Ahmad Laksamana bertentangan dengan Akidah dan hukum Islam dan beliau juga mengamut dan menyebarkan ajaran salah.

- 2. Jawatankuasa Fatwa Selangor memutuskan ajaran ini sesat. Diwartakan pada 23 Nov.1995 Sel.P.U. 44.*

Ahmad Laksamana, pengarang buku Hakikat Insan telah dikenakan tindakan oleh Mahkamah Kota Bharu berikut²⁶

- Di bawah undang-undang 68(1) Majlis Ugama Islam 2/6 dan denda RM250.00 atau sebulan penjara.*
- Di bawah undang- undang 69 Enakmen yang sama dan didenda RM250.00 atau penjara 3 bulan.*
- Di bawah undang- undang 74(1) Enakmen yang sama dengan penjara selama 3 bulan.*

b. Buku Ad-Dur An-Nafis

Buku ini adalah karangan Asy-Syeikh Muhammad Nafis b. Idris Al-Banjari. Naskhah yang ada adalah terbitan Maktabah Wa Matba'ah Dar Al-Maarif di Pulau Pinang, Malaysia. Tiada tahun percetakan dinyatakan dalam naskhah ini.

Dinyatakan dalam naskhah yang ada bahawa kandungan yang terdapat dalam naskhah ini tidak sama semuanya dengan kitab asal. Penerbit telah mencetak buku ini berdasarkan naskhah yang ada padanya semata-mata.

Ringkasan Kandungan Kitab

Buku ini boleh dibahagikan kepada bahagian-bahagian berikut;

- Pendahuluan
- Fasal Satu
- Fasal Dua
- Fasal Tiga
- Fasal Empat
- Penutup

Berikut adalah ringkasan kitab ini, sebelum dinyatakan ulasan mengenainya.

Pendahuluan

²⁶ Lihat halaman web Pusat Islam Malaysia di www.islam.gov.my/sesat/BM/

Di dalam pendahuluan, buku ini menyatakan mengenai perkara yang membatalkan suluk iaitu malas, futur (lemah) dan malal (jemu). Penulis kemudian menyatakan pula perkara yang menegahkan suluk syirik khafi, riya', sum`ah dan ujub.

Fasal Satu

Fasal satu membincangkan mengenai *Tauhid Al-Afal* (Mengesakan Perbuatan Allah). *Tauhid Al-Afal* bererti berkeyakinan bahawa semua perbuatan dari Allah taala baik yang buruk atau yang baik.

Walau bagaimana pun, semua manusia tidak boleh melampaui syariat nabi Muhammad s.a.w dengan mengerjakan suruhan dan menjauhi larangan. Tidak boleh juga beriktikad bahawa gugur taklif dengan keyakinan di atas. Ini supaya manusia tidak menjadikannya sebagai alasan bagi melakukan keburukan.

Berkaitan dengan tingkah laku manusia, pengarang kitab menyatakan empat pandangan mazhab, iaitu;

1. Semua perbuatan adalah dari manusia semata-mata. Ini adalah pandangan Muktaizilah.
2. Semua perbuatan adalah dari Allah taala sahaja. Ini adalah pandangan Jabariyah.
3. Semua perbuatan adalah dari Allah taala tetapi manusia berusaha. Ini adalah pandangan Ahlus Sunnah.
4. Semua perbuatan dipandang dari Allah taala tetapi sandarannya pada hamba. Ini adalah pandangan Ahli Kasyaf.

Tauhid Al-Afal adalah maqam pertama yang diberikan kepada seorang yang salik.

Fasal Dua

Fasal ini membicarakan mengenai *Tauhid Al-Asma'* (Pengesaan Nama-nama Allah). *Tauhid Al-Asma'* adalah pandangan hamba dengan mata kepala dan mata hati bahawa segala asma' (benda) itu kembali pada Allah taala. Setiap kali kita melihat alam ini, seorang hamba merasakan bahawa setiap sesuatu hanyalah gambaran pada Allah taala. Tiada wujud sebenar hanya wujud Allah. Wujud alam hanyalah khayalan.

Ini adalah maqam kedua. Ini adalah maqam golongan Arifin.

Fasal Tiga

Fasal ini membicarakan mengenai *Tauhid As-Sifat* (Pengesaan Sifat-sifat Allah). *Tauhid As-Sifat* bermaksud mengesakan Allah taala pada segala sifat yang berdiri pada zat Allah atau fana' sifat makhluk dalam sifat Allah taala.

Ertinya setiap kali seorang hamba melihat dengan mata hati bahawa segala sifat yang ada pada makhluk hanya ada pada Allah sahaja. Sifat yang disandarkan pada makhluk hanya

Penutup

Dalam bahagian penutup, pengarang kitab menyatakan bahawa apa yang ditulis adalah rahsia yang halus dan perkataan yang dalam. Ia tidak diketahui kecuali oleh ulama yang rasikh. Tidak boleh pula menyatakan atau menzahirkan kepada bukan ahlinya.

Pengarang kemudian menerangkan pengertian Syariat, Tarikat dan Hakikat. Syariat ialah mengikut perintah dan menjauhi larangan tanpa diikuti dengan amal di hati. Tarikat ialah menyembah Allah taala dengan ilmu dan amal atau mengamalkan apa yang diketahui. Hakikat ialah memandang akan Allah taala dengan cahaya yang diletakkan dalam diri. Syariat dan Hakikat saling melazimi antara satu sama lain.

Dengan mencapai hakikat akan memperolehi *wilayah* (taraf wali). *Wilayah* boleh diusahakan oleh hamba dengan ibadah.

Pengarang kemudian menerangkan erti *Mujahadah*, *Riadhah*, *Muraqabah* dan *Syuhud*. Pengarang kemudian menerangkan mengenai keramat. Pengarang kemudian menyenaraikan 20 keramat di dunia dan 20 keramat di akhirat berdasarkan pandangan Imam Al-Ghazali.

Akhir sekali pengarang menerangkan mengenai selawat dan kelebihanannya.

Ulasan

1. Buku ini mengandungi banyak Hadits-hadits Dh'aif yang tidak mempunyai asal usul.

Berikut adalah senarai Hadits-hadits Dh'aif / Maudhu' yang didapati;

“Manusia itu semuanya tidur. Apabila ia mati maka bangunlah ia²⁷”

“Matilah kamu sebelum kamu mati²⁸”

“Aku adalah perbendaharaan yang tersembunyi. Aku suka untuk dikenali. Maka aku cipta makhluk agar mereka mengenaliKu²⁹”

²⁷ *Ad-Dur An-Nafis*, ms 14. Muhammad Nasirudin Al-Bani dalam bukunya *Silsilah Al-Ahadits Ad-Daifah Wa Al-Maudu'ah* terbitan Maktabah Al-Ma'arif, Riyadh, jld 1, hadits no. 102 telah menulis bahawa hadits ini tidak ada sumber aslinya. Telah diriwayatkan oleh Al-Ghazali dalam *Ihya' 4/20* secara marfu' kepada Rasulullah s.a.w. Oleh sebab itu, Al-'Iraqi dalam kitabnya *Takhrij Al-Ahadits Al-Ihya' 4/170* berkata “Saya tidak mendapati hadits tersebut bersanad marfu' hingga Rasulullah s.a.w akan tetapi menganggap berasal dari Ali b. Abi Talib r.a.

²⁸ *Ad-Dur An-Nafis*, ms 14. Hadits ini dikategorikan sebagai Maudu' oleh Ali b. Sultan Muhammad Al-Harwi Al-Qari dalam kitab *Al-Masmu' Fi Makrifat Al-Hadits Al-Maudu'*, Maktabah Ar-Rusyd, Riyadh, 1984, ms 515. Beliau menukil Al-Asqalani berkata bahawa hadits ini tidak tsabit. Hadits Maudu' ialah hadits yang dicipta oleh seseorang lalu disandarkan kepada Rasulullah s.a.w.

“Sesiapa beramal dengan apa yang ia ketahui, Allah taala akan mewariskannya ilmu yang ia tidak ketahui³⁰”

“Orang yang paling kenal akan tuhaninya ialah orang yang paling kenal akan dirinya³¹”

“Ada di antara ilmu yang seperti sesuatu yang tersembunyi yang tidak dimengerti kecuali orang alim terhadap Allah taala.³²”

“Abu Bakr bukan melebihi kamu kerana banyak berpuasa atau banyak bersolat tetapi kerana rahsia yang ada di hatinya³³”

²⁹ *Ad-Dur An-Nafis*, ms 22. Ismail b. Muhammad b. Al-`Ajaluni Al-Jirahi dalam kitabnya *Kasy Al-Khafa` Wa Muzil Al-Ilbas` Amm Isytahar Min Al-Ahadits*, Muassah Ar-Risalah, Beirut, juz 2, ms 173, berkata bahawa Ibn Taimiyah berkata bahawa lafaz ini bukan dari ucapan Rasulullah s.a.w dan tidak diketahui sanad yang sahih atau pun da`if baginya. Pendapat ini diikuti oleh Az-Zarkasyi, Ibn Hajr dalam kita *Al-Lali` dan As-Suyuti*. Al-Qari pula berkata bahawa makna hadits ini adalah sahih berdasarkan dari firman Allah taala “Dan tidaklah aku cipta manusia dan jin kecuali untuk beribadah padaKu”.

³⁰ Muhammad Nasirudin Al-Bani dalam bukunya *Silsilah Al-Ahadits Ad-Daifah Wa Al-Maudu`ah* terbitan Maktabah Al-Ma`arif, Riyadh, jld 1, hadits no. 422 telah menulis hadits ini maudu`. Abu Nu`aim 10/14-15 mengeluarkannya dengan sanad Ahmad b. Hanbal dari Yazid b. Harun dari Humaid At-Tawil dari Anas b. malik kemudian berkata “Imam Ahmad menyebutkan riwayat di atas yang diambilnya dari Tabi`in dari ucapan Isa b. Maryam a.s kemudian sebagian perawi menyanggah bahawa Imam Ahmad menyandarkan sabda itu pada Rasulullah s.a.w, kemudian mereka membuat sanad palsu.” Menurut saya dalam sanad tersebut banyak perawai yang saya tidak ketahui kerana itu saya tidak mengenali siapakah yang memalsukan sanadnya.

³¹ *Ad-Dur An-Nafis*, ms 26. Muhammad Nasirudin Al-Bani dalam bukunya *Silsilah Al-Ahadits Ad-Daifah Wa Al-Maudu`ah* terbitan Maktabah Al-Ma`arif, Riyadh, jld 1, hadits no. 66 yang berbunyi “من عرف نفسه عرف ربه” yang bermaksud “Barangsiapa yang mengenal dirinya, maka ia telah mengenal tuhaninya” telah menulis bahawa hadits ini tidak ada sumbernya. Demikian pernyataan Imam An-Nawawi sambil menyatakan bahawa hadits ini tidak ada kepastian sumbernya. Bahkan dikatakan termasuk dalam ucapan yang disandarkan kepada Yahya b. Mu`adz Ar-Razi. Imam As-Suyuti dalam kitab *Dzail Al-Maudu`at*, ms 203, bersepakat dengan Imam An-Nawawi. Oleh Ibn Taimiyah hadits ini dinyatakan maudu`. Fairuz Badi menyatakan bahawa ia bukan hadits nabawi namun kebanyakan orang mengatakannya sebagai hadits Rasulullah s.a.w. Anggapan ini tidaklah benar. Yang jelas, ia termasuk dalam Israiliyat yang isinya antara lain “Wahai manusia! Kenalilah dirimu nescaya kau akan mengenal tuhanmu”.

³² *Ad-Dur An-Nafis*, ms 28. Muhammad Nasirudin Al-Bani dalam bukunya *Silsilah Al-Ahadits Ad-Daifah Wa Al-Maudu`ah* terbitan Maktabah Al-Ma`arif, Riyadh, jld 2, hadits no. 870 telah menulis bahawa hadits ini sangat da`if (lemah). Diriwayatkan oleh Abu Abdul Rahman As-Sulami dalam *Al-Arba`in As-Sufiyah* (II/8), juga oleh Abu Utsman An-Nujairmi dalam *Al-Fawaid* (II/7) dengan sanad dari Nasr b. Muhammad bin Al-Harits dari Abdul Salam b. Salih dari Sufyan b. Uyainah dari Ibn Jurajj dari Ata` dari Abu Hurairah r.a.

³³ *Ad-Dur An-Nafis*, ms 28. Muhammad Nasirudin Al-Bani dalam bukunya *Silsilah Al-Ahadits Ad-Daifah Wa Al-Maudu`ah* terbitan Maktabah Al-Ma`arif, Riyadh, jld 2, hadits no. 962 telah menulis bahawa hadits ini tidak ada sumber asalnya yang marfu`. Al-Hafiz Al`Iraqi dalam kitab *Takhrij Al-Ihya`* (1/30 dan 105) mengatakan “Telah diriwayatkan oleh At-Tirmizi dan Al-Hakim dalam An-Nawadir dari ucapan Bakr b. Abdullah Al-Muzni dan saya tidak dapat sumber sanadnya yang marfu”. Pernyataan tersebut jug adisepakati oleh Al-Hafiz As-Sakhawi dalam kitab *Al-Maqasidul Hasanah* (nombor 970).

Berikut pula adalah hadits-hadits yang tidak dinyatakan sanad, rujukan serta komen mengenainya. Ia juga tidak ditemui dalam buku-buku hadits yang muktabar.

“Tidak bergerak sesuatu zarah kecuali dengan izin Allah taala”

“Sesungguhnya setiap sesuatu selain Allah taala itu batil”

“Allah taala ada dan tiada sesuatu yang ada bersertaNya”

“Demi jiwa Muhammad berada di tangannya. Sekiranya kamu hুলurkan tali dari langit ke bumi nescaya turun ia atas wujud Allah taala kemudian dari itu ia membaca ‘Dia Yang Awal dan Dia Yang Akhir’”

“Yang pertama yang dijadikan oleh Allah taala ialah cahaya nabimu, wahai Jabir. Maka Ia mencipta darinya (cahaya nabi) segala sesuatu dan engkau sebahagian dari sesuatu itu”

“Aku dari Allah taala dan orang-orang beriman dariku”

“Aku bapa segala ruh dan Adam bapa segala manusia”

“Bertafakkur sesaat lebh baik dari beribadat tujuh puluh tahun”

“Aku kenali tuhanku dengan tuhanku”

“Sesungguhnya manusia yang paling diazab di Hari Kiamat seorang alim yang ilmunya tidak memberi manfaat padanya”

“Kami, para nabi-nabi, diperintah untuk bercakap pada manusia pada kadar akal mereka”

“Sesiapa yang menuntut sesuatu dengan sungguh-sungguh, ia akan mendapatinya”

Oleh kerana hadits-hadits lemah ini dijadikan sandaran bagi ajaran yang disampaikan, maka ajaran yang disampaikan juga menjadi lemah dan tidak dapat dijadikan pegangan.

Dengan melihat pada aspek ini maka dapat dibuat ulasan bahawa pengarang kitab ini telah tidak berhati-hati dalam penulisannya dan dalam mengasaskan sesuatu pandangan dengan menggunakan hadits-hadits yang lemah dan palsu.

Pengarang juga telah gagal mengikut kaedah yang betul dalam mengemukakan hadits-hadits dalam penulisannya. Kebanyakan hadits yang dinyatakan tidak disebutkan perawinya walau pun dari kalangan para sahabat dan sumber rujukannya e.g Riwayat Al-Bukhari. Pengarang juga telah tidak memberi apa-apa komentar terhadap hadits yang

dikutip olehnya. Gaya penulisannya jelas menunjukkan bahawa pengarang mengutip hadits di atas dengan tujuan sebagai dalil bagi pegangannya bukan sebagai periwiyatan semata-mata.

Semua ini bertentangan dengan apa yang telah ditetapkan oleh para ulama hadits mengenai hadits-hadits yang lemah dan palsu.

Persoalan ini bertambah serius jika ditinjau bahawa isu yang dibincangkan oleh pengarang ialah persoalan aqidah yang merupakan persoalan pokok atau prinsip dalam Islam. Penggunaan hadits-hadits dalam buku ini tidak dapat dilihat sama sekali dalam konteks untuk Fada'il A'amal.

1. Buku ini membahaskan persoalan aqidah dari perspektif Ahli Tasauf.

Ini dapat dilihat dari nukilan-nukilan yang dipetik oleh penulis kitab ini kebanyakannya adalah nukilan-nukilan dari tokoh-tokoh dalam bidang Tasauf bagi mendokong penulisan beliau seperti Syeikh Abdul Qadir Al-Jilani, Syeikh Abdul Karim Al-Khalili, Abdullah b. Hijazi Asy-Syarqawi Al-Misri, Syeikh Abdul Wahab Asy-Sya'rani, Syeikh Yusuf Abu Zarrah Al-Misri, Sahl b. Abdullah At-Tusturi.

Ini dapat juga dilihat dari penggunaan istilah-istilah seperti Fana', Baqa' dan Tajalli.

2. Buku ini mengandungi ajaran mengenai Nur Muhammad.

Ini dapat dilihat dari petikan berikut

“Maka adalah nabi kita Muhammad s.a.w iaitulah Hawiyatul Alam ertinya hakikat alam dan asal segala Asyya' (benda) kerana bahawasanya segala Asyya' (benda) itu dijadikan daripada nur nabi kita Muhammad s.a.w seperti sabdanya s.a.w bagi saidina Jabir r.a. demikian bunyinya

اول ما خلق الله نور نبيك يا جابر مخلوق هذه الاشياء

Ertinya “Bermula-mula yang dijadikan Allah taala itu cahaya nabimu, hai Jabir!. Maka dijadikan daripadanya itu segala Asyya' (benda). Maka bersabda pula ia bagi Jabir itu bermula engkau itu setengah daripada segala asyya' (benda). Bermula makna dijadikan itu dizahirkan dan pada hadits lain sabda nabi s.a.w

أنا من الله والمؤمنون مني

Ertinya “Aku daripada Allah taala dan segala mukmin daripadaku.”

Dan lagi sabda nabi s.a.w

إن الله خلق روح النبي (ص) من ذاته وخلق العالم
بأسره من نور محمد (ص)

Ertinya “Bahawasanya Allah taala telah menjadikan ia akan ruh nabi Muhammad s.a.w daripada zatNya dan menjadikan ia akan alam sekaliannya daripada nur Muhammad s.a.w.” maka sabdanya (nabi Muhammad s.a.w)

يا جابر إن الله خلق قبل الأندلس نور نبيه من نوره

Ertinya “Wahai Jabir! Bahawasanya Allah taala telah menjadikan ia dahulu daripada segala Asyya’ (benda) itu akan nur nabimu iaitu dijadikan ia daripada ZatNya”

Daripada yang demikian itu bahawasanya nabi kita Muhammad s.a.w daripada nur Zat Allah dan yang demeikian itu maka menama Allah taala akan dia di dalam Al-Quran yang mulia dengana nurNya seperti firmanNya Yang Maha Tinggi

لقد جاءكم من الله نور

Ertinya “Telah datang akan kamu daripada Allah taala itu nur iaitu nur nabi kita Muhammad s.a.w.

Noktah : Ertinya ini suatu perkataan yang dimaksudkan dalamnya setelah sudah engkau ketahui daripada sekalian yang tersebut itu yakni daripada bahawasanya segala perbuatan ini perbuatan Allah taala dan tiada bagi hamba itu sekali-kali punya perbuatan dan segala Asma’ itu sekalian Asma’ Allah dan segala sifat itu sekaliannya sifat Allaha taala jua. Hanya yang ada makhluk ini mazhar wujudnya jua dan bahawasanya nabi kita Muhammad

s.a.w itu dijadikan ia daripada Nur Zat Allah taala dan sekalian makhluk dijadikan daripadanya. Ialah asal kejadian dan asal hayat kehidupan makhluk ini sekaliannya.³⁴”

3. Buku ini mengandungi ajaran yang seiras dengan konsep Martabat Tujuh.

Ini dapat dilihat dari petikan berikut

“Bermula ini satu khatimah (penutup) pada menyatakan segala martabat Tajalli Zat. Ketahuilah olehmu, hai Salik, bahawasanya tajjalli zat itu tujuh martabat kemudian daripada tanazulnya... .. Yang pertama-tama daripada segala martabat Tanazul Zat itu iaitu martabat Ahadiyah namanya... .. Yang kedua daripada segala martabat Tanazul Zat itu iaitu martabat Wahdah namanya... .. Yang ketiga dari segala martabat Tanazul Zat itu iaitu martabat Wahidiah. Yang keempat dari segala martabat Tanazul Zat itu iaitu martabat Alam Arwah... .. Yang kelima dari segala martabat Tanazul Zat itu iaitu Alam Mitsal... .. Yang keenam dari segala martabat Tanazul Zat itu iaitu martabat Alam Ajsad... .. Yang ketujuh dari segala martabat Tanazul Zat itu iaitu yang menghimpunkan bagi segala martabat yang enam dahulu itu serta dan iaitu martabat Tajalli dan lepas yang akhir dan iaitu martabat Insan namanya maka inilah Tujuh Martabat. Bermula yang pertama darinya itu iaitu yang tiada zuhur (nyata) dan yang enam yang tinggal itu iaitu martabat zuhur (nyata) dan adalah martabat yang ketujuh ini apabila naik makrifat orang yang mempunyai martabat yang ketujuh ini dan zahir padanya sekalian martabat yang enam adahulu itu serta luas makrifatnya maka dikatakan dia Insan Yang Kamil yakni manusia yang sempurna....³⁵”

4. Buku ini membincangkan aqidah juga dari perspektif ahli falsafah.

Ini dapat dilihat dari penggunaan konsep Martabat Tujuh dalam buku ini yang jelas merupakan satu unsur dari falsafah dahulu yang digunakan untuk membincangkan isu aqidah.

³⁴ *Ad-Dur An-Nafis*, ms 21, 22 dan 23.

³⁵ *Ad-Dur An-Nafis*, ms 21 – 23.

Ini juga dapat dilihat melalui konsep Pandang Yang Banyak Di Dalam Yang Satu (شبهوا الوحدة في الكثرة) dan konsep Pandang Yang Satu Di dalam Yang Banyak (شبهوا الكثرة في الوحدة)³⁶.

5. Dalam buku ini pengarang berkali-kali menafikan akan konsep hulul (penyatuan) hamba dengan Allah taala secara hakiki dan menganggap bahawa konsep-konsep yang secara zahir seperti bercanggah dengan syariat hanyalah dimaksudkan dengan erti kiasan. Pengarang juga menegaskan bahawa pegangan terhadap konsep-konsep seperti Nur Muhammad, Martabat Tajalli, Fana' dan Baqa' atas dasar bahawa segala ini adalah rahsia yang hanya boleh difahami oleh mereka yang mendapat kurnia dari Allah taala taala. Secara tersiratnya memberi pengertian bahawa ketidakmampuan majoriti umat Islam untuk memahami atau merasakannya bukan hujah ke atas kebatilannya.

Sa'id Hawwa di dalam bukunya *Al-Asas Fi As-Sunnah Wa Fiqhiha (Al-Aqa'id Al-Islamiah)* menulis³⁷

“Mereka yang berpegang dengan konsep Wahdatul Wujud dengan pengertian bahawa alam ini adalah sebahagian dari Zat Ilahi, ini adalah kekufuran yang nyata. Allah taala berfirman

وَجَدُوا لَهُ مَرْءًا يَدْعُهُمْ إِنَّا لَكَاذِبُونَ كَاذِبِينَ

“Dan mereka menjadikan sebahagian dari hamba-hambanya sebagai sebahagian dariNya. Sesungguhnya manusia itu benar-benar pengingkar yang nyata.” (Az-Zukhruf: 15)

Sebahagian dari ulama kita membezakan antara mereka dengan golongan lain yang menyebutkan kalimah Wahdatul Wujud tetapi mengkehendaki darinya pengertian bahawa alam ini berdiri atas perintah Allah taala, tidak terbebas dariNya. Mereka ini tidak termasuk dalam golongan yang pertama.

Saya berpendapat bahawa ke atas ulama kaum muslimin hendaklah mensucikan persoalan aqidah, membersihkannya dan menjauhi dari segala bentuk kekeliruan. Mereka hendaklah mengemukakan persoalan aqidah kepada manusia secara jelas dan nyata.

³⁶ *Ad-Dur An-Nafis*, ms 19.

³⁷ Sa'id Hawwa, *Al-Asas Fi As-Sunnah Wa Fiqhiha (Al-'Aqa'id Al-Islamiah)*, Dar As-Salam, 1992, jld 1, ms 439.

Demikianlah adab Islam dalam segala sesuatu. Sesungguhnya kita telah dilarang dari tenggelam dalam perincian. Adapun Al-Imam Al-Ghazali rahimahullah tidak meninggalkan tidak meninggalkan satu pernyataan atau rangkap syair yang boleh mengeliru masyarakat awam kecuali ia akan menafsirkannya dengan tafsiran yang benar. Golongan yang suka mendalami kata-kata yang berbelit dan mengelirukan tidak layak untuk memimpin manusia sekiranya ia telah menjadi kebiasaan mereka. Manusia memerlukan kepada penjelasan yang jelas. Allah taala berfirman

وَأَنْزَلْنَا إِلَيْكَ الذِّكْرَ لِتُبَيِّنَ لِلنَّاسِ مَا نُزِّلَ بِهِمْ

“Dan Kami telah turunkan kepada kau (Muhammad) satu peringatan (Al-Quran) untuk kau jelaskan pada manusia apa yang diturunkan kepada mereka.” (An-Nahl : 44)

b. Buku Kamarul Huda

Buku ini dikarang oleh Muhammad Yusuf. Naskah yang ada adalah dalam bentuk salinan fotokopi dari yang asal yang dicetak oleh *Matba`ah Al-Ahmadiyah*, Singapura. Tiada tarikh penerbitan dan percetakan ditemui.

Di muka hadapan buku ini ada menerangkan ringkasan isi kandungan buku ini iaitu

“Maka adalah membicarakan di dalam kitab ini permasalahan ilmu Usuluddin bagi orang yang dapat tahqiq dengan dia atas jalan yang sempurna dan adalah beberapa rahsia dari hal Takbiratul Ihram dan sembahyang dan beberapa perkara jalan tauhid bagi hakikat dan makrifat bagi orang yang berpedomankan akal yang sejatinya, insyaAllah taala, dapatlah segala rahsia tauhid itu adanya dan adalah pada akhir kitab ini hakikat rahsia-rahsia bagi rukun-rukun haji dan pengenalan tauhid bagi pekerjaan haji”

Buku ini disusun berdasarkan topik-topik perbicaraan. Sebelum membuat ulasan terhadapnya, dibentangkan ringkasan bagi setiap topik yang dihuraikan oleh pengarang kitab ini.

Pendahuluan

Dalam pendahuluan buku ini, pengarang menerangkan mengenai kepentingan Dua Kalimah Syahadah dan kepentingan untuk memastikan kesahihannya. Untuk memastikan kesahihan Dua Kalimah Syahadah, seseorang itu perlu mengetahui pengertian sebenar

Dua Kalimah Syadah dan tuntutananya. Ia meliputi apa yang wajib, mustahil dan harus bagi Allah taala dan Rasulullah s.a.w.

Awwaluddin Ma'rifatullah

Hakikat Ma'rifatullah ialah mengenai hakikat Lailahaillah melalui ilmu Usuluddin. Pengarang kemudian menerangkan mengenai Hukum Akal yang terbahagi pada Wajib, Mustahil dan Jaiz.

Pengarang kemudian menerangkan dua puluh sifat yang wajib bagi Allah taala dan dua puluh sifat yang mustahil pula bagi Allah taala. Sifat dua puluh yang wajib lalu dibahagikan pada empat pula iaitu Nafsiah, Salbiah, Ma'ani dan Ma'nawiyah. Sifat-sifat ini pula dibahagikan jugapada Istighna' dan Iftiqar.

Bayan Kalimah Tauhid

Dalam topik ini pengarang kitab menerangkan mengenai rukun bagi Kalimah Tauhid, iaitu

1. Itsbat Zat Allah taala.
2. Itsbat Sifat Sifat.
3. Itsbat Af'ala Allah taala.
4. Iktikad Kebenaran Rasulullah s.a.w

مختلف الإيمان - Perbezaan Iman

Dalam topik ini, pengarang kitab menghuraikan mengenai perbezaan iman yang ada dalam diri manusia, iaitu

1. Taqlid.

Iman yang didengar dari kata-kata yang lain tanpa dalil.

2. Ilmu Yaqin.

Iman kepada segala perkara akidah dengan dalil.

3. A'yan.

Iman seseorang yang hatinya tidak lupa walau sekejap pun pada Allah taala. Ini iman Ahli Muraqabah.

4. Iman Haq.

Iman seseorang yang memsyahadahkan Allah taala dengan hati. Ini adalah iman orang Arifin.

5. Iman Hakikat.

Iman seseorang yang tidak dipandang melainkan Allah taala daripada segala perbuatan dalam perbuatan Allah taala. Ini adalah iman orang Waqifin yang dinamakan maqam Fana'.

Bayan Iktikad Ahli Sunnah Wal Jamaah

Dalam topik ini pengarang kitab menerangkan bahawa iktikad Ahli Sunnah Wal Jamaah tidak akan didapati oleh seseorang kecuali ia mengenal dirinya sendiri dan perlu membaca buku-buku Ahli Sunnah wal Jamaah.

Untuk mendapat iktikad Ahli Sunnah wal Jamaah perlu mempelajari ilmu Hakikat dan Tasauf.

Ilmu Hakikat ialah ilmu Tauhid manakala ilmu Tasauf pula ialah ilmu akal dan fikir.

Bicara Iktikad

Dalam topik ini pengarang kitab membicarakan mengenai iktikad Jabariah, iktikad Ahli Sunnah dan iktikad Qadariyah.

Iktikad Jabariyah ialah iktikad yang menafikan usaha dan ikhtiar dari manusia. Iktikad Ahli Sunnah ialah iktikad yang mewajibkan usaha dan ikhtiar tetapi tidak mewajib usaha itu memberi bekas atau tercapai kerana keberhasilan dari usaha itu hukumnya harus tertakluk pada izin Allah taala semata-mata. Iktikad Qadariyah pula ialah iktikad yang menetapkan bahawa segala perbuatan manusia adalah dari usaha dan ikhtiar mereka dan kesan atau keberhasilan usaha itu adalah disebabkan dari usaha manusia tiada kena mengena dengan Allah taala taala.

Iktikad Ahli Sunnah adalah pertengahan dari iktikad Jabariyah dan Qadariyah. Sesiapa yang tidak mengetahui hakikat Jabariyah dan Qadariyah maka tidak sempurna iktikad Ahli Sunnah padanya.

Bayan Anasir Empat

Dalam topik ini pengarang menerangkan mengenai anasir empat iaitu Api, Air, Angin dan Tanah. Keempat anasir ini wujud dalam diri manusia dan mempengaruhi nafsunya samada nafu Ammarah, Lawwamah, Mulhimah atau Mutmainnah. Pengarang kemudian menerangkan secara terperinci mengenai ke empat nafsu ini.

Bayan Hakikat Rukun Iman

Dalam topik ini, pengarang menerangkan mengenai rukun iman yang enam secara terperinci.

Bicara Hakikat Sembahyang

Dalam topik ini pengarang menerangkan bahawa hakikat sembahyang terletak pada perkataan ‘الحمد’ (Al-Hamdu).

Alif adalah lambang solat Subuh. Lam adalah lambang solat Zuhur. Ha’ adalah lambang solat Asar. Mim adalah lambang solat Maghrib. Dal adalah lambang solat Isya’.

Pengarang kemudian menerangkan asal usul setiap solat iaitu solah Subuh berasal dari nabi Adam yang melakukannya kerana selamat diturunkan ke bumi. Zuhur adalah solat yang berasal dari nabi Ibrahim kerana anaknya Ismail terselamat dari disembelih. Asar berasal dari nabi Yunus kerana dikeluarkan dari perut ikan. Maghrib berasal dari nabi Isa yang melakukan kerana terselamat dari pengejaran kaum yang ingin membunuhnya. Isya’ berasal dari Musa yang melakukannya ketika ia tersesat jalan setelah keluar dari Mesir.

Pengarang kemudian menerangkan sebab bagi setiap rakaat dari setiap solat secara terperinci.

Pengarang kemudian menerangkan akan kepentingan gabungan unsur jasmani dan rohani dalam sembahyang – bahawa sembahyang bukan hanya amal zahir semata-mata tetapi juga mempunyai amal batin.

Pengarang kemudian menerangkan mengenai hakikat Al-Fatihah pula. Pengertian Al-Fatihah tertumpu pada “الحمد” (Al-Hamdu). Lima huruf pada kalimah ini melambangkan lima Tajalli tuhan.

Alif mengisyaratkan Zat Allah taala. Lam mengisyaratkan Sifat Allah taala. Ha’ mengisyaratkan Asma’ Allah taala. Mim mengisyaratkan Af al Allah taala. Dal mengisyaratkan Sir (rahsia) Allah taala.

Syarat Bagi Hakikat Takbiratul Ihram

Takbiratul Ihram terdiri dari lafaz “تَكْبِيرَةٌ”.

Lafaz “الله” mengisyaratkan pada makna-makna berikut Alif ialah Tauhid Zat, Lam ialah Tauhid Sifat, Lam ialah Tauhid Asma’ dan Ha ialah Tauhid Af’al. Lafaz “أَكْبَرُ” mengisyaratkan pada makna-makna berikut Alif ialah Siddiq, Kaf ialah Amanah Ba’ ialah Tabligh dan Ra’ ialah Fatanah.

Syarat Bagi Hakikat Sembahyang

Dalam topik ini pengarang menerangkan bahawa hakikat sembahyang itu dengan ‘احمد’ (Ahmad).

Alif ialah Qiyam (Berdiri), Ha’ ialah Ruku’, Mim ialah Sujud dan Dal ialah Duduk.

Pengarang kitab juga menerangkan bahawa pada perkataan itu terdapat empat perkara iaitu Ihram, Mikraj, Munajat dan Tabaddul dan menerangkan setiap empat ini.

Syarat Bagi Hakikat Niat

Dalam topik ini pengarang kitab menerangkan mengenai niat terbahagi pada dua bahagian, iaitu Niat Wasal dan Niat Waqaf.

Niat Wasal adalah niat yang hakiki manakala Niat Waqaf adalah niat yang majazi (kiasan). Dalam niat pula terdapat tiga perkara iaitu Qasad, Ta`arrud dan Ta`yin.

Qasad terbahagi pada dua iaitu tubuh dan hati. Ta`arrud pula terbahagi pada lafzi dan hakiki. Ta`yin terbahagi pada jasmani dan ruhani.

Syarat Hakiki Bagi Kiblat

Dalam topik ini pengarang kitab menerangkan bahawa kiblat terbahagi pada dua;

1. Kiblat Tubuh iaitu Baitullah.
2. Kiblat Nyawa iaitu Zat Allah taala taala.

Martabat Tauhid

Dalam topik ini pengarang kitab membahagikan martabat tauhid pada Martabat `Am dan Martabat Khas.

Martabat `Am ialah dengan menyebut Lailahaillah dan memahami maknanya. Martabat Tauhid Khas pula terbahagi pada tiga iaitu;

1. *Tauhid Af'al* iaitu seorang hamba pada setiap kali memandang *Af'al* (perbuatan) makhluk, ia tidak memandang kecuali *Af'al* (perbuatan) Allah taala jua.
2. *Tauhid Sifat* iaitu seorang hamba mengesakan sifat Allah taala dan sifat makhluk.
3. *Tauhid Zat* iaitu seorang hamba mengembalikan segala zat kepada Zat Allah taala.

Dasar bagi konsep ini ialah kerana apa jua sifat dan perbuatan makhluk adalah cermin bagi sifat dan perbuatan Allah taala. Sifat dan perbuatan alam adalah hanya kiasa yang hakiki ialah sifat dan perbuatan Allah taala. Ini kerana alam hanyalah percikan dari Allah taala.

Pada Hakikat Anasir Empat

Dalam topik ini pengarang kitab menerangkan erti perkataan “عنصر” (unsur).

“ ع ” mengisyaratkan erti *Arif*. “ ن ” mengisyaratkan erti *Nur*. “ ص ” mengisyaratkan erti *Sirat*. “ ر ” mengisyaratkan erti *Rabbi*.

“ ع ” adalah Api. “ ن ” adalah Angin. “ ص ” adalah Air. “ ر ” adalah tanah.

Asal bumi dari tanah. Asal air dari angin. Asal Angin dari api. Asal api dari rahsia. Asal rahsia pula dari Nur Muhammad. Asal Nur Muhammad dari Nur Allah taala.

Hakikat Ibarat Amsal

Dalam topik ini pengarang kitab menerangkan mengenai *Alam Kabir* (besar) dan *Saghir* (kecil) dan kaitan antara keduanya. *Alam Kabir* ialah bumi dan langit. *Alam Saghir* ialah insan.

Pengarang kitab kemudian menerangkan kemuliaan ciptaan manusia. Manusia perlu mencapai hakikat / makrifat iaitu mengenal Allah taala. Ini dicapai dengan belajar pada guru yang mursyid.

Hakikat insan pula harus melalui proses berikut;

1. Jauhar iaitu kewujudan pada *Alam Kabir* pada *Ta'yun Awwal*, masuk badan dan keluar dari badan.
2. Anfas iaitu kewujudan dalam *Alam Arwah*, tidak masuk badan dan tetap ia di luar badan.
3. *Nufus* iaitu turun ia pada bapa.
4. *Tanaffus* iaitu apabila ia menjadi *nutfah* di dalam rahim ibu.
5. *Nafas* iaitu apabila ia keluar ke dunia, masuk ke dalam badan dan keluar.

Pengarang kemudian menerangkan mengenai ruh iaitu ia terdiri dari ruh dan raihan. Pada istilah Ahli Tahqiq ia dikenali dengan *Ruh Quds*, *Idhafi*, *Ruhani*, *Ruhul Hayat*, *Ruh Alam*, *Ruh Jamadat*, *Ruh Nabatat*, *Ruh Hayawanat*, *Ruh Insan*, *Ruh Kamalat* dan *Ruh Ajsam*.

Bahagian Tauhid Takbiratul Ihram

Dalam topik ini pengarang kitab menerangkan hakikat Takbiratul Ihram yang mengandungi *Qasad*, *Ta'arrud* dan *Ta'yin* yang kemudiannya dikembangkan pula pada konsep Makrifatullah.

Lafaz Allah taala

Dalam topik ini pengarang kitab menerangkan bahawa lafaz Allah taala itu dinamakan dengan *Alam Jazbah* (جذبة) iaitu semua golongan *Arif Billah* setiap kali memandang

akan *Asma'* dan *Zat* akan memandang Allah taala – ia tidak memandang akan benda berkenaan secara hakiki tetapi ia akan mengingat akan dirinya yang mengenal Allah taala dan yang ia pandang itu Allah taala pada hakikatnya.

“ا” Alif mengisyaratkan *Alam Lahut*. “ل” Lam mengisyaratkan *Alam Jabarut*.
“ع” Lam mengisyaratkan *Alam Asma'*. “ه” Ha mengisyaratkan *Alam Syahadah*.

Makna Sembahyang

Dalam topik ini pengarang kita menghuraikan secara terperinci pengertian Tauhid Takbiratul Ihram yang perlu diketahui iaitu

1. *Ihram* – karam dalam laut yang dalam.
2. *Mikraj* – naik dari martabat Awam kepada Khas.
3. *Munajat* – bermohon hamba pada tuhan sebagaimana yang terdapat dalam Al-Fatihah.
4. *Tabaddul* – ditukarkan yang Fana dan diganti yang Baqa'

Allah Akbar

Dalam topik ini pengarang kitab menghuraikan lafaz “الله أكبر” Allah Akbar yang mengandungi empat maqam. Apabila seorang hamba menunaikan sembahyang maka hendaklah berusaha mencapai maqam-maqam ini, iaitu;

1. Maqam *Ihram* iaitu hamba *Fana'* sehingga tidak teringat ketika merasakan lazat selain teringatkan *Afal* Allah taala.
2. Maqam *Mi'raj* iaitu hamba dalam menunaikan sembahyang merasa berjumpa tuhan ketika *Fana'* sehingga tiada *Asma'* pada ketika itu kecuali *Asma'* Allah taala.
3. Maqam *Munajat* iaitu hamba dalam menunaikan sembahyang berpindah wujud di dalam kalimah insan rahsia Allah taala sehingga merasa tiada yang menghidupkan kecuali Allah taala semata-mata.
4. Maqam *Tabaddul* iaitu hamba dalam menunaikan sembahyang naik martabat kerana kerana wujud rahsia Allah taala pada dirinya sehingga merasa bahawa tiada wujud lagi melainkan sudah berpindah pada wujud Allah taala.

Pengarang kemudian menerangkan bahawa apa yang telah ditulisnya adalah satu ilmu yang penting tetapi merupakan rahsia Allah taala yang dikenali dengan ilmu Hakikat dan juga ilmu kaum sufi. Setiap manusia hendaklah mempelajari ilmu ini untuk mencapai Makrifatullah dan mempelajarinya hendaklah melalui seorang guru. Ertinya

mempelajarinya adalah wajib tetapi mempelajarinya tanpa kefahaman dan bimbingan adalah haram. Tidak boleh pula menyampaikannya kecuali pada ahlinya.

Kasyful Ghummah

Dalam topik ini pengarang menerangkan mengenai kematian dan sakaratul maut, kesulitan dalam menghadapinya dan bagaimana menghadapinya.

Rahsia Hakikat Haji

Naskhah yang ada tidak mengandungi topik ini secara lengkap.

Ulasan

1. Buku ini mengandungi banyak hadits-hadits daif yang tidak mempunyai asal usul.

Berikut adalah senarai hadits-hadits daif yang didapati;

“Bermula agama itu adalah akal. Tiada agama bagi mereka yang tiada akal baginya”³⁸.”

“Sesiapa yang mengenali dirinya maka ia telah mengenali Tuhannya.”³⁹”

“Orang yang paling kenal akan dirinya adalah orang yang paling kenal Tuhannya”⁴⁰.”

“Bermula sembahyang itu bukan bukan ia lain dariNya dan orang yang mengerjakan sembahyang itu ghaib”⁴¹.”

³⁸ Muhammad Yusuf, *Kamarul Huda*, ms 20. Muhammad Nasirudin Al-Bani dalam bukunya *Silsilah Al-Ahadits Ad-Daifah Wa Al-Maudu'ah* terbitan Maktabah Al-Ma'arif, Riyadh, jld 1, hadits no. 1 telah menulis bahawa hadits tersebut batil. Diriwayatkan oleh Imam An-Nasa'I dari Abi Malik Basyir b. Ghalib kemudian ia berkata “Haditha ini adalah batil munkar.” Menurut Al-Bani satu hal yang perlu dipegang ialah semua riwayat / hadits yang menyatakan keutamaan akal adalah tidak sah. Semua berkisar antara Dha'if dan Maudhu'. Ibn Qayyim dalam kitab *Al-Manar* menyatakan bahawa hadits-hadits yang berkenaan dengan akal semuanya dusta belaka.

³⁹ Muhammad Yusuf, *Kamarul Huda*, ms 37. Muhammad Nasirudin Al-Bani dalam bukunya *Silsilah Al-Ahadits Ad-Daifah Wa Al-Maudu'ah* terbitan Maktabah Al-Ma'arif, Riyadh, jld 1, hadits no. 66 menyatakan bahawa hadits ini tidak ada sumbernya. Demikian pernyataan Imam An-Nawawi sambil menyatakan bahawa hadits ini tidak ada kepastian sumbernya. Bahkan konon termasuk ucapan yang disandarkan kepada yahya b. Mu'az Ar-Razi. Imam As-Suyuti dalam kitab *Zail Al-Maudhu'at*, halaman 203 menyepakati Imam An-Nawawi. Ibn Taimiyah menyatakan hadits ini Maudhu'. Fairuz Badi menyatakan bahawa itu bukan hadits nabawi, namun kebanyakan orang mengatakannya sebagai hadits Rasulullah s.a.w. Anggapan itu tidaklah benar. Yang jelas, ia termasuklah Israiliyai yang isinya antara lain *“Wahai manusia kenalilah dirimu, maka engkau akan mengenal Tuhanmu.”*

⁴⁰ Muhammad Yusuf, *Kamarul Huda*, ms 37. Lihat nota kaki 35.

⁴¹ Muhammad Yusuf, *Kamarul Huda*, ms 30.

“Tiada suatu yang terlebih baik dari seribu baik melainkan insan.”⁴²”

“Keluarlah kamu dari batang tubuhmu dan nyawamu maka keluarkan kamu dari hukumku dan daripada suruhanku maka sampailah kamu padaku”⁴³.”

Rujuk perbincangan mengenai Hadits Dha`if dan Maudhu` di bab 4 yang menunjukkan bahawa buku ini telah terseleweng dari mengikuti manhaj Ilmu Hadits bagi menjaga kebenaran ajaran yang disampaikan.

2. Buku ini membahaskan persoalan aqidah dari perspektif Ahli Tasauf.

Ini dapat dilihat seperti di bawah

“Hendaklah kamu karamkan dirimu dan kamu karamkan segala perbuatanmu itu di dalam Fi`lullah semata-mata”⁴⁴.”

3. Buku ini mengandungi ajaran yang seiras dengan konsep Martabat Tujuh dan Wahdatul Wujud.

Ini dapat dilihat seperti di bawah ini

“Iman itu terbahagi atas enam bahagi. Pertama iman Taqlid, iaitu iman yang jadi didengar daripada kata-kata orang lain dengan ketiadaan dalil yang nyata. Kedua iman daripada Ilmu Yaqin, iaitu iman yang jadi daripada makrifat kepada segala aqid dan dalil. Ketiga iman daripada A`ayan, iaitu iman yang jadi bagi Ahli Muraqabah – sekiranya hatinya tidak lupa dnegan sekejap pun akan kepada Allah. Keempat iman daripada Haq, iaitu iman yang jadi daripada aghyar (أخبار) yang musyahadahkan keadaan Allah dengan hati. Keenam iman daripada Hakikat, iaitu iman yang jadi daripada keadaan yang tiada dipandang melainkan Allah daripada segala Af`al dalam Af`al Allah”⁴⁵.”

Mengenai Martabat Tauhid.

“Ketahuilah olehmu pada menyatakan Martabat Tauhid. Bermula Martabat Tauhid yang `Am itu menyebut

⁴² Muhammad Yusuf, *Kamarul Huda*, ms 36.

⁴³ Muhammad Yusuf, *Kamarul Huda*, ms 43.

⁴⁴ Muhammad Yusuf, *Kamarul Huda*, ms 32.

⁴⁵ Muhammad Yusuf, *Kamarul Huda*, ms 19.

Lailahaillah. Maka hendaklah diketahui akan maknanya...demikianlah menyebut kalimat itu dnegan tiada ketahui maknanya tiada berguna, sia-sia sahaja. Bermula Tauhid Khas itu atas tiga bahagi. Pertama Tauhid Af'al (perbuatan), kedua Tauhid Sifat, ketiga Tauhid Zat. Adapun Tauhid Af'al itu mahulah kita pandang dan kit aketahui Af'al Allah dan Af'al makhluk. Maka yang kamilnya nisbahkan kepada haq dan makhluk kerana Iradah dan Qudrah makhluk ini suatu titik daripada laut Iradah dan Qudrah Allah jua. Maka terpandanglah bahawa diri ini bayang-bayang dan terpandang kepada yang empunya bayang-bayang dan fana 'lah perbuatan hamba bagi perbuatannya kerana Qiyam Allah atasnya maka iaitu Af'al Allah semata-mata. Maka barangsiapa menyebutkan Fa`il (pelaku) Hakiki lain daripada Allah maka sesat adanya. Maka tatkala Allah Allah hendak menzahirkan Af'alNya maka Fi`il makhluk inilah tempat nyata. Maka kekallah sifat Qudrat supaya sempurnalah pengetahuan dan pengenalan kita kerana zahirlah padanya nisbah Fi`il (perbuatan) itu. Maka orang inilah Arif yang beroleh isyarat mengesakan Fi`ilnya dengan Fi`il Allah. Bermula kesudahan ruju'nya kepada permulaan iaitu Allah jua. Maka yang lain daripada Allah tiada hakikat baginya – dan dengan zahir wujud maka zahir segala maujudat. Bermula Tauhid Sifat itu ertinya mengesakan sifat Allah dengan sifat makhluk. Maka bahawasanya alam insan itu suatu percik daripada hakikat ilahi kerana sifat Allah itu Qadim dan sifat makhluk itu muhdits dan sifat Allah itu Baqi (kekal) dan sifat makhluk itu Fani (fana' – binasa). Maka apabila kita ketahui nisbah ini maka sayugialah kita mengesakan sifat Allah dengan sifat makhluk. Bermula ruju''sifat kamal insan kepada ilahi dan ghaiblah di dalamnya yakni fana'lah sifat dirinya yang zahir ini kepada sifat diri yang batin – martabat menfana'kan hakikat batin kepada wujud (Ahadiatul Jama') (أحادية الجموع). Maka batinnya inilah yang mugharim (karam) laut tauhid (Ahadiatus Sarf) (أحادية السرف) yakni La Ta'yun – yang tiada nyata kenyataannya. Ini segala Arif mengesakan sifatnya dnegan sifat Allah. Bermula Tauhid Zat itu ruju' (kembali) segala zat Kaun (benda) sekalianya kepada zat – Ahadiyah (أحادية) – kerana karamlah sekalian di dalamnya. Bahawa ada pandangnya diri yang zahir atsar kepada haq atasnay maka dipandang wujudnya itu menzahirnya dan Haq menzahir dalamnya. Dan dilihat dirinya ma'dum daripada pihak kejadiannya dan maujud

daripada pihak hakikatnya kerana yang zahir ini bayang-bayang yang batin di dalam sifat Allah (Tajalli `Am)....⁴⁶”

Apa yang tertulis di atas jelas menunjukkan persamaannya dengan ajaran Wahdatul Wujud dan Emanasi. Ini dikuatkan lagi dengan penggunaan istilah-istilah yang sama. Sekali pun jika penulis kitab ini tidak bermaksud erti penulisannya di atas atas makna yang zahir tetapi makna kiasan, ia tetap bersalahan dari segi syara' kerana kekeliruan yang merbahaya boleh berlaku.

4. Buku mengandungi huraian yang bercirikan Tafsir Isyari atau Tafsir Batin dan berunsur falsafah yang tidak bersandarkan logik dan dalil.

Ini dapat dilihat seperti di bawah ini

a. Mengenai dua kalimah syahadah.

“(La) itu dalilnya Ilmul Yaqin (علم اليقين), (Ilah) itu dalilnya Ainul Yaqin (عين اليقين), (Illa) itu dalilnya Haqqul Yaqin (حقوق اليقين), (Allah) itu dalilnya Kamalul Yaqin (كمال اليقين). Ilmul Yaqin itu martabat nafi (نفي), yakni kemudian daripada sudah ketahui akan jalan nafi baharulah yakin, Ainul Yaqin itu martabat manfi (منفي), yakni sebenar-benarnya sudah nyata apa yang ditolakkan kemudian baharulah yakin, Haqqul Yaqin itu pada martabat itsbat yakni ditetapkan sebenarnya hak itu bagi Allah kemudian baharulah yakin, Kamalul Yaqin itu pada martabat mitsbat, yakni dikekalkan di dalam makrifat sifat kesempurnaan kepada Allah kemudian baharulah yakin.

(La) itu sifat Jalal ertinya kebesaran tuhan maka adalah padanya lima sifat dari sifat dua puluh. (Ilah) itu sifat Jamal ertinya kemuliaan Tuhan, maka dalah padanya enam sifat daripada sifat dua puluh. (Illa) itu sifat Qahhar ertinya kekeerasan Tuhan, maka adalah padanya empat sifat daripada sifat dua puluh. (Allah) itu sifat Kamal ertinya kesempurnaan Tuhan, maka dalah padanya lima sifat daripada sifat dua puluh.....(La) itu (ممكن وجود بدر الوجود) itu zaman hal iaitu keadaan waktu sekarang seperti apa yang-apa yang ada ini langit dan bumi dan isi keduanya iaitu semeanya nanti lenyap kemudian. (Ilah) itu (ممكن وجود بدر الوجود) itu zaman Madi (ماضي) iaitu keadaan yang dahulu daripada zaman nabi Adam dan Hawa dan lain-lainnya,

⁴⁶ Muhammad Yufuf, *Kamarul Huda*, ms 32 – 32.

waktunya yang dahulu itu sekarang sudah tiada lagi. (Illa) itu (عصر) iaitu zaman Istiqbal, iaitu keadaan lagi akan datang seperti yang dibangkit daripada mati dan lihat barang-barang yang gahib di anatar bangkit daripada kubur dan sampai syurga atau neraka. (Allah) itu (الله) itu zaman (عصر) iaitu adalah salah satu zaman yang tiada dijadikan di dalam segala zaman, iaitu tertentu kepada satu waktu tatkala melihat Tuhan kita di dalam syurga.⁴⁷”

b. Mengenai Sembahyang.

“Bicara Hakikat Sembahyang. (الحمد) maka adalah terbit sembahyang lima waktu itu daripada huruf (الحمد), itulah hakikat sembahyang hendak diketahui. Bermula Alif itu subuh dan Lam itu waktu Zohor dan Ha itu waktu Asar dan Mim itu waktu Maghrib dan Dal itu waktu Waktu Isya⁴⁸.”

“Allah Akbar. Dan Allah (الله) itu empat huruf, inilah huruf Muqaranah Kamaliah – Tauhid Zat, Tauhid Sifat, Tauhid Asma’, tauhid Afal – Akbar (البر) itu empat huruf inilah rupa huruf Muqaranah `Urfiah – Sifat Siddiq, Sifat Amanah, Sifat Tabligh, Sifat Fatanah – maka jalan inilah kit asembahkan zat yang suci iaitu Zat Wajibu Wujud Qadim lagi Azali. Maka jalan ini tuntutan olehmu kepada guru yang mursyid⁴⁹.”

“Bermula adalah hakikat sembahyang itu dengan huruf Ahmad (أحمد) - Qiyam, Ruku’, Sujud, Qu`ud – Berdiri maqam Alif (أ). Ruku’ maqam Ha (ح). Sujud maqam Mim (م). Duduk maqam Dal (د).

Pertama Ihram (أحرام). Kedua Mikraj (معراج). Ketiga Munajat (مناجاة) Keempat Tabaddul (تبديل)⁵⁰.”

Kesimpulan Umum

⁴⁷ Muhammad Yusuf, *Kamarul Huda*, ms 17 - 18.

⁴⁸ Muhammad Yusuf, *Kamarul Huda*, ms 28.

⁴⁹ Muhammad Yusuf, *Kamarul Huda*, ms 31.

⁵⁰ Muhammad Yusuf, *Kamarul Huda*, ms 31.

Jika ditinjau kandungan kitab-kitab yang dinyatakan ternyata semuanya mempunyai persamaan iaitu kewujudan unsur-unsur ajaran Wahdatul Wujud, Emanasi, Martabat Tujuh dan Tasauf – Falsafah – Batiniyah.

Ini dikuatkan lagi dengan penggunaan istilah-istilah yang sama seperti *Wahdah, La Ta`yun, Ta`yyun Awwal* dan *Wahidiah*.

Ini menunjukkan bahawa kesemua buku ini mempunyai kaitan antara satu sama lain.

Adalah dinasihatkan agar buku ini tidak dibeli jika dijual dikedai atau dibaca. Hendaklah juga meninggalkan mana-mana pengajian yang mengajar buku-buku ini atau ajaran yang seumpama dalam buku-buku ini.

PROFIL RINGKAS PEMBENTANG KERTAS KERJA

Nama : Muhammad Haniff Hassan

Pekerjaan : Pengurus, Sekretariat PERDAUS

Kelulusan : Sarjana Muda Pengajian Islam (Syariah), Fakulti Pengajian Islam
Universiti Kebangsaan Malaysia

**Penglibatan
Sekarang** : Setiausaha PERDAUS

Ahli Lembaga Rayuan Syariah, MUIS

Ahli Lembaga Penasihat Syariah, Keppel Insurance

Ahli Jawatankuasa Pengurus Madrasah Al-Irsyad Al-Islamiah

Editor, Majalah At-Takwin

LAMPIRAN A

KESAN-KESAN & BAHAYA AJARAN SESAT

1. Membawa kemungkinan seseorang itu menjadi murtad kerana syirik atau menyalahi prinsip-prinsip utama ajaran Islam.
2. Menyebabkan amalan dan ibadat seseorang tidak diterima. Akibatnya segala perbuatan dan sumber yang dicurahkan menjadi sia-sia dan sekiranya ia mati sedemikian ia akan rugi dan kecewa.
3. Menyebabkan perpecahan dan permusuhan sesama umat Islam. Ini khususnya berlaku apabila ajaran berkenaan mendakwa bahawa orang yang selain dari kumpulannya salah atau kurang ke-Islamannya jika dibanding dengan mereka.
4. Membuka peluang kepada golongan tertentu untuk mendapatkan kepentingan diri sendiri di dunia ini.
5. Menggalakkan kehidupan yang berteraskan pemuasan nafsu sehingga melahirkan gejala anak luar nikah dan amalan seks bebas dalam masyarakat.
6. Menimbulkan ancaman pada keselamatan negara dan keharmonian masyarakat. Berikut adalah insiden-insiden yang berlaku berkaitan dengan ajaran sesat;
 - ◆ Pada 19 Ogos 1979, seramai 4 orang pengikut Ajaran Ilmu Kasyaf pimpinan Hj. Kamarudin @ Abdullah Sani Kajang, mati terbunuh dalam satu peristiwa di Kerling, Selangor.
 - ◆ Pada 19 Oktober 1974 seorang dari kumpulan ajaran sesat Empat Sahabat pimpinan Syed Mutalib di Kg. Kedap, Rantau Panjang, Kelantan, mati ditembak dalam pertempuran dengan pasukan keselamatan.
 - ◆ Pada 16 Oktober 1980, 8 orang dari kumpulan ajaran sesat pimpinan Ahmad Nasir Ismail (Kemboja) yang mengaku Imam Mahadi telah terbunuh apabila mereka menyerang Balai Polis Batu Pahat, Johor.

¹ Rasulullah s.a.w bersabda

“Barangsiapa melakukan sesuatu amalan yang bukan dari urusan kami maka ia tertolak.” (Riwayat Muslim)

Allah taala berfirman

“Katakanlah adakah mahu aku beritahu pada kamu tentang golongan yang paling rugi amalannya. Mereka yang sesat usahanya dalam kehidupan dunia sedangkan mereka menyangka bahawa mereka telah mengelakkan perbuatannya.” (Al-Kahfi:103 – 104)

- ◆ Pada Pada 7 Julai 1979, Tajul Ariffin yang mengaku dirinya Imam Mahdi telah mencederakan Tuan Haji Damanhuri Hj. Abdul Wahab, imam Masjid Rapat Setia, Ipoh, Perak².
 - ◆ Insiden di Sauk, Perak oleh kumpulan Al-Ma'unah.
7. Menghalang kemajuan dan pembangunan rakyat dan negara. Ini jika dikaitkan dengan ajaran yang bersifat penolakan terhadap dunia dan berlebihan-lebihan dalam zuhud.
 8. Menghambat kemajuan dakwah. Sering kali kemunculan ajaran seperti ini telah memalingkan fokus usaha dakwah dari keutamaan-keutamaan yang lain.

SEBAB-SEBAB KEMUNCULAN PERKEMBANGAN AJARAN SESAT

Sebab utama kemunculan ajaran sesat adalah kejahilan terhadap hakikat Islam itu sendiri. Kejahilan ini wujud pada kedua-dua si pengajar dan yang belajar.

Kejahilan ini dapat disimpulkan seperti berikut;

1. Jahil tentang sumber-sumber utama ajaran Islam yang sebenar telah mendorong seseorang itu mempelajari mengenai Islam dari sumber yang tidak wajar sehingga ia membuat kesimpulan dan kefahaman yang salah tentang Islam. Hasil dari kefahaman itu, diajarkan pula pada yang lain.
2. Jahil tentang sifat-sifat ulama yang sebenar sehingga tidak tahu membezakan antara seorang alim yang tulen dengan yang palsu.
3. Jahil tentang ilmu-ilmu alat yang membantu proses kefahaman yang betul terhadap Al-Quran dan as-Sunnah. Ilmu-ilmu ini ialah seperti Ulum Al-Quran, Ulum Al-Hadits dan Usul Fiqh. Ada segelintir pengajar dan pengikut ajaran sesat yang mempelajari Islam ini melalui sumber yang betul iaitu Al-Quran dan as-Sunnah, tetapi kerana mereka tidak mempunyai alat yang betul atau tidak mengetahui bagaimana menggunakan alat yang betul untuk membuat kesimpulan hukum yang betul, telah mengakibatkan kefahaman mereka menyeleweng dan sesat.

Ajaran sesat berkembang juga kerana sebabsebab ini disokong pula oleh sebab-sebab berikut

1. Penggunaan ayat-ayat Al-Quran bagi menyokong ajaran dan tafsiran yang dibuat. Masyarakat umum biasanya menerima apa jua yang dikatakan datang dari Al-Quran dan kurang memeriksanya.

² Lihat halaman web Pusat Islam Malaysia www.islam.gov.my/sesat/BM

2. Keghairahan untuk mencari ilmu-ilmu Islam dan keinginan yang amat sangat mendapat sesuatu yang tinggi dan bernilai.
3. Kebijaksanaan guru menyampaikan ajarannya sesuai dengan logik yang dapat diterima oleh akal dan gaya yang memukau.
4. Dorongan kuat untuk memperolehi kepentingan dunia. Di peringkat guru, kerana ingin mudah kaya dan hidup, ia akan menggunakan kebijaksanaannya untuk memperolehi kekayaan itu. Di peringkat murid pula, ia didorong oleh keyakinan bahawa guru berkenaan mampu untuk memberinya kekayaan atau kesenangan. Contohnya ialah insiden yang dilakukan oleh Mona Fandey.
5. Dorongan kuat untuk mengecapi kepuasan seks seperti ajaran yang mengatakan bahawa tidak sah sesuatu pernikahan sebelum guru melaksanakan nikah batin iaitu isteri-isteri menyerahkan diri mereka pada si guru. Terdapat juga ajaran yang membenarkan para pengikutnya mengamalkan seks bebas dengan bertukar-tukar pasangan.
6. Dorongan kuat untuk memperolehi kedudukan sosial. Di kalangan pengajar ajaran sesat keinginan untuk dihormati dan memiliki kedudukan yang tinggi di sisi manusia telah mendorong mereka menyebarkan ajaran yang menyeleweng seperti mendakwa sebagai Imam Mahdi, wali atau Nabi Isa. Bagi pengikut pula, ada di kalangan mereka yang mengikuti ajaran tertentu kerana meyakini ajaran berkenaan akan membantu mereka mencapai status sosial yang tinggi seperti jawatan politik.
7. Faktor psikologi dan mental. Ada di kalangan pengajar ajaran sesat yang didapati mempunyai gangguan mental yang menimbulkan khayalan-khayalan dan pelbagai lintasan. Di kalangan pengikut pula, ramai di kalangan mereka ini yang terpengaruh asalnya kerana faktor psikologi dan masalah mental seperti tekanan perasaan, masalah rumah tangga dan kehidupan, sehingga apabila ia bertemu dengan seorang yang boleh menjadi tempat ia bergantung, mereka akan terus percaya dan mudah diperdaya.
8. Kepercayaan terhadap mistik. Semua masyarakat mempunyai kepercayaan terhadap mistik dan perkara yang ghaib. Naluri seperti ini mudah diambil kesempatan oleh pelbagai pihak untuk pelbagai kepentingan.

SIFAT-SIFAT & CIRI-CIRI AJARAN SESAT

1. Ajaran - ajaran sesat mempercayai bahawa kuasa-kuasa ghaib dan luar biasa itu ada juga pada selain daripada Allah. Maksudnya, kuasa-kuasa itu boleh ada pada manusia yang dianggap alim atau wara' atau wali yang dipercayai boleh mengetahui perkara

perkara yang ghaib³ dan mempunyai kuasa yang di luar kemampuan manusia⁴.

2. Ajaran dilakukan secara tidak berterangterangan, bersembunyi, rahsia atau penyampaiannya hanya kepada ahli-ahli kumpulan sahaja⁵.

³ Islam mengajar bahawa hanya Allah ta'ala sahaja yang mengetahui perkara-perkara yang ghaib. Ini berdasarkan pada firman Allah ta'ala

“Dan Allah sekali-kali tidak akan menampakkan kepada kamu hal-hal yang ghaib” (Ali-Imran : 179)

“Dan pada sisi Allah kunci-kunci semua yang ghaib. Tiada yang mengetahuinya kecuali Dia sendiri” (Al-An'am : 59)

Hatta Rasulullah s.a.w sendiri tidak mengetahui perkara yang ghaib kecuali jika diberitahu oleh Allah ta'ala. Allah ta'ala berfirman

“Katakanlah aku tidak mengatakan padamu bahawa perbendaharaan Allah ada padaku dan tidak (pula) aku mengetahui yang ghaib.” (Al-An'am : 59)

⁴ Perkara-perkara luar biasa sememangnya boleh berlaku. Ahlus Sunnah Wal Jamaah membahagikannya kepada kategori berikut;

1. Mukjizat, iaitu sesuatu yang luar biasa yang kelihatan pada seorang hamba pilihan Allah ta'ala iaitu nabi dan rasul untuk membuktikan kebenaran, menundukkan cabaran orang-orang yang tidak beriman dan mengukuhkan keyakinan orang yang beriman.
2. Karamah, iaitu sesuatu yang luar biasa yang kelihatan pada hamba Allah yang salih seperti para mujahidin yang tidak terluka apabila terkena senjata musuh.
3. Ma'unah, iaitu sesuatu yang luar biasa yang kelihatan pada seseorang yang tidak diketahui keadaannya atau pada orang biasa seperti seorang yang terselamat dari luka atau maut sedangkan keretanya remuk dalam kemalangan.
4. Istidraj, iaitu sesuatu yang luar biasa yang kelihatan pada seseorang yang kafur atau ahli maksiat sehinggakan menjadi ia lebih kafur dan ingkar misalnya nikmat luar biasa yang diberikan pada Firaun dan Qarun.
5. Sihir, iaitu sesuatu yang luar biasa yang kelihatan pada seseorang hasil dari amalan tertentu yang dibantu oleh jin atau syaitan.

⁵ Islam mewajibkan umatnya menyampaikan ajarannya kepada seluruh manusia. Ini terdapat dalam firman Allah ta'ala

“Serulah pada jalan Tuhanmu dengan cara hikmah dan contoh yang baik dan berdebatlah dengan mereka dengan perdebatan yang paling baik” (An-Nahl : 125)

“Hendaklah ada dari kalangan kamu satu umat yang menyeru kepada kebaikan dan menyuruh pada yang makruf dan yang mencegah dari yang munkar dan mereka itulah golongan yang berjaya.” (Ali-Imran : 104)

Islam melarang umatnya menyembunyikan ilmu pengetahuan yang benar. Allah ta'ala berfirman

3. Ajaran yang meletakkan ketua atau sheikh atau pak guru ke taraf yang amat tinggi melebihi had yang biasanya untuk manusia, atau meletakkan ketua atau sheikh atau pak guru ke taraf wali atau wakil Nabi Muhammad s.a.w⁶. Wujud arahan supaya menghormati sheikh itu dan meyakini bahawa tidak akan berhasil sesuatu maksud kecuali dengan usaha atau kekuasaan beliau⁷.

“Sesungguhnya mereka yang menyembunyikan apa yang telah Kami turunkan dari keterangan-keterangan dan petunjuk setelah kami menerangkannya pada manusia dalam Kitab, Allah akan melaknat mereka dan segala makhluk yang boleh melaknat akan melaknat mereka.” (Al-Baqarah:159)

Islam membenarkan umatnya berahsia dalam mengamalkan Islam hanya dalam keadaan yang mana pengamalan Islam akan menimbulkan ancaman yang berat seperti siksaan atau jel oleh musuh-musuhnya. Walaupun Rasulullah s.a.w pernah berdakwah secara bersembunyi tetapi ini hanya dilakukan dalam satu tempoh yang pendek semata-mata. Setelah itu Allah ta’ala memerintahkan Islam disampaikan secara terbuka walau pun Rasulullah s.a.w perlu menanggung pelbagai kesulitan.

⁶ Di dalam buku Asas-asas Akidah oleh Abdullah Irwani, terjemahan Abdul Majid Abdullah, terbitan Pustaka Salam Sdn. Bhd, Kuala Lumpur, tahun 1992, ms 94 ditulis

“Maha Guru As-Syeikh Abdul Bari An-Nadawi pernah menjelaskan jawapan kepada pertanyaan di dalam kitabnya (_____) Antara Tasauf Dan Kehidupan di bawah tajuk Tanda-tanda seorang Syeikh yang kamil (sempurna) ialah;

- a. Memiliki ilmu sebanyak mungkin yang diperlukan.
- b. Menjaga akidah, amal dan akhlak menurut syariat.
- c. Tidak tamakkan dunia dan tidak menganggap dirinya telah sempurna kerana itu adalah satu cabang cintakan dunia.
- d. Ia pernah bersama (belajar) dengan seorang lain yang sempurna (Syeikh).
- e. Ulama-ulama dan Syeikh semasa yang beramal telah menaruh sangka baik kepadanya (mengiktirafnya).
- f. Ia disukainya oleh golongan khusus dan bijak pandai yang berpegang pada agama lebih dari disukai oleh orang awam.
- g. Orang-orang yang mengakui taat setia kepadanya, kebanyakan mereka sangat kuat berpegang pada syarak dan kurang tamak kepada dunia.
- h. Ia bersifat belas kasihan dan berlembut terhadap muridnya semasa mengajar dan memberitahu mereka, bila dia melihat atau mendengar keburukan yang dilakukan oleh muridnya ia mencela dan menegahnya, bukan memberi sokongan.
- i. Orang yang bersahabat padanya merasai kurangnya cinta pada dunia dan merasa bertambah cintanya kepada Allah.
- j. Dirinya sentiasa sibuk berzikir, kerana tanpa amal dan tanpa keazaman tidak akan mendapat barakah semasa mengajar.
- k. Tidak mengharap sambutan hebat dan tumpuan orang hasil dari penyampaiannya kerana itu tidak semestinya ia dapat menguasai mereka di mana untuk mendapat perhatian penumpuan orang adalah merupakan peranan jiwa yang dapat ditingkatkan dengan latihan, bukanlah khusus pada sifat taqwa, kerana orang kafir pun mampu menguasai orang ramai.”

⁷ Islam menggalakkan umatnya menghormati ulama dan guru tetapi melarang dari meletakkan seseorang ke darjat para rasul dan nabi kerana tiada tiada lagi nabi dan rasul yang diutus setelah nabi Muhammad s.a.w. Allah taala berfirman

“Tidaklah Muhammad itu bapa salah seorang dari kamu tetapi (beliau) adalah Rasulullah dan penutup nabi-nabi...” (Al-Ahzab:40)

4. Ajaran agar tidak memberi perhatian kepada guru-guru yang lain kerana ia akan menghalang atau menyekat dari mendapat sesuatu dari sheikhnya dan tertutup limpah kurnia Allah kepadanya⁸.
5. Tidak boleh mengkritik dan menegur sesuatu perbuatan yang dilakukan sheikhnya sekali pun nyata perbuatan itu haram. Juga seorang pengikut itu tidak boleh menyoal sheikhnya mengenai apa-apa perbuatannya.⁹
6. Adanya dakwaan bahawa sheikhnya adalah keturunan Rasulullah s.a.w tanpa salasilah yang jelas yang dapat dibuktikan¹⁰.

Dakwaan bahawa seseorang itu adalah wakil nabi Muhammad s.a.w adalah tidak logik kerana nabi Muhammad s.a.w telah wafat dan tidak mungkin ia dapat kembali untuk melantik wakilnya di dunia ini. Jika yang dimaksudkan sebagai wakil itu ialah khalifah sebagaimana khalifah Abu Bakar, maka jawabannya ialah di zaman ini khalifah dilantik oleh pemilihan umat Islam. Individu tidak boleh melantik dirinya sendiri dan Rasulullah s.a.w tidak lagi melantik khalifahnya di dunia ini.

Islam mengajar bahawa hanya Allah taala semata-mata yang menentukan samada sesuatu perkara akan berlaku atau tidak. Meyakini bahawa sesuatu perkara tidak akan tercapai tanpa bantuan atau kuasa dari guru adalah bercanggah dengan aqidah.

⁸ Islam mengajar umatnya agar mengambil ilmu dari pelbagai sumber. Allah taala berfirman

“Maka berikanlah berita gembira pada hamba-hambaku. Mereka yang mendengar pendapat dan mengikut apa yang terbaik darinya” (Az-Zumar:17 – 18)

Rasulullah s.a.w bersabda

“Hikmah (ilmu) adalah barang yang hilang dari seorang mukmin. Di mana ia menjumpainya maka ia lebih berhak terhadapnya.”

Islam melarang umatnya dari memandang rendah pada orang lain. Allah taala berfirman

“Wahai orang-orang yang beriman! Janganlah satu kaum mentertawakan satu kaum yang lain. Kemungkinan mereka (yang ditertawakan) itu lebih baik dari mereka dan janganlah orang-orang perempuan mentertawakan orang-orang perempuan yang lain. Kemungkinan mereka (yang ditertawakan) lebih baik dari mereka.....” (Al-Hujurat:11)

⁹ Rasulullah s.a.w sendiri sering ditanya akan oleh para sahabatnya akan perbuatan yang dia lakukan. Dalam sirah Rasulullah s.a.w diriwayatkan

- a. Semasa Peperangan Badr, seorang sahabat bertanya kepada Rasulullah s.a.w akan sebab beliau memilih tempat bagi markaz tenteranya. Sahabat berkenaan lalu mencadangkan tempat yang lebih baik dan Rasulullah s.a.w menerimanya.
- b. Umar r.a pernah bertanya pada Rasulullah s.a.w akan sebab beliau bersetuju dengan isi kandungan Perjanjian Hudaibiyah yang dilihatnya sebagai berat sebelah dan Rasulullah s.a.w tidak melarang perbuatannya walau pun beliau tidak bersetuju dengan Umar r.a.

¹⁰ Islam sememangnya memuliakan keluarga Rasulullah s.a.w tetapi ia bukan bukti akan kebenaran sesuatu ajaran.

7. Keyakinan bahawa tiap-tiap berkat yang didapati di dunia dan akhirat adalah hasil atau disebabkan oleh berkat sheikhnya¹¹.
8. Larangan membuka rahsia mengenai ajaran kumpulan itu kerana kepercayaan bahawa jika membuka rahsia, pengikut itu akan ditimpa bahaya¹².
9. Tidak dibenarkan berkahwin dengan wanita yang disukai oleh sheikhnya demikian juga tidak boleh berkahwin dengan balu sheikhnya¹³.
10. Hendaklah menghadirkan rupa guru pada setiap kali berdoa dan meminta daripada beliau limpahnya dan menghilangkan was-was¹⁴.

¹¹ Rujuk nota kaki 4.

¹² Rujuk nota kaki 3.

¹³ Islam hanya melarang umatnya dari menikahi mahramnya sahaja. Isteri sheikh yang bukan dalam kategori mahram seseorang tidak terlarang dari dinikahi. Hukum larangan menikahi bekas isteri-isteri Rasulullah s.a.w hanyalah khusus pada mereka sahaja dan tidak pada yang lain. Melarang sesuatu atas dasar agama tanpa dalil adalah bid'ah. Rasulullah s.a.w bersabda

“Sesiapa yang melakukan sesuatu amalan yang bukan dari urusan kami, maka ia tertolak.” (Riwayat Muslim)

¹⁴ Islam mengajar umatnya agar berdoa langsung pada Allah ta'ala dan sentiasa meyakini bahawa Allah ta'ala akan mendengar dan menjawab doanya. Allah ta'ala berfirman

“Dan apabila hamba-hambaKu bertanya padamu mengenaiKu maka (katakanlah) bahawa aku sangat hampir. Aku menjawab doa orang yang berdoa jika ia berdoa padaKu. Maka sahutlah daku dan berimanlah padaKu.” (Al-Baqarah:186)

Rasulullah s.a.w bersabda:

“Aku pada sangkaan hambaKu terhadapKu, maka terserahlah dia hendak menyangka apa yang disukainya terhadap Aku” (Riwayat Muslim & Hakim)

“Aku pada sangkaan hambaKu terhadapKu dan Aku sentiasa bersamanya jika ia mengingatiKu” (Riwayat Muslim & Hakim)

“Aku pada sangkaan hambaKu terhadapKu dan Aku bersamanya jika ia berdoa kepadaKu” (Riwayat Ahmad)

Hadits-hadits ini mengajar umat Islam agar sentiasa bersangka baik terhadap Allah ta'ala supaya kita memperolehi yang baik-baik pula dariNya dan agar menjauhi dari sangka buruk terhadap Allah ta'ala kerana yang buruk kelak yang akan diberiNya. Apabila berdoa hendaklah menyertakan keyakinan di dalam hati bahawa Allah akan mengabulkan doa kita. (*Lihat Hadits Qudsi : Analisa dan Komentar (Edisi Baru) oleh Syed Ahmad Semait, Pustaka Islamiyah, Singapura, 1996, ms 165 – 169.*)

Meyakini bahawa doa kita tidak akan terjawab kecuali dengan sebab-sebab seseorang adalah bercanggah dengan aqidah.

11. Ajaran yang menjalankan istiadat yang dikatakan berzikir atau beribadat atau bersuluk yang caranya berlawanan dengan adab yang diluluskan oleh agama Islam atau dengan cara yang pelik seperti mesti melakukan amalan tersebut dalam keadaan gelap, berselubung, percampuran lelaki dan perempuan, dan menggunakan perkataan yang tidak difahami seperti hu..hu...hu¹⁵.
12. Ajaran yang memberi hak milik dan kuasa mutlak kepada ketua, sheikh atau pak guru untuk menguasai harta pengikut-pengikut serta anak isteri mereka¹⁶.
13. Ajaran yang menggunakan kebolehan merawat penyakit secara ajaib, menolong menyampaikan hajat-hajat besar pengikut-pengikut dengan cara yang seolah-olah keramat sebagai suatu daya tarikan¹⁷.
14. Ajaran yang menggunakan syarat-syarat tertentu, yang dikenakan kepada murid-muridnya, umpamanya bayaran \$500 yang perlu diserahkan kepada tok guru atau sheikh sendiri¹⁸.
15. Guru dan anggota ajaran sesat biasanya menghina, mencari kesilapan serta merendahkan kebolehan dan ilmu para alim ulama Islam. Mereka menuduh para alim ulama Islam yang ada hari ini hanya membesar-besarkan soal zahir (kulit) sahaja dan tidak membongkar rahsia-rahsia yang ada dalam hukum-hukum ibadat. Ada juga tuduhan bahawa para alim ulama Islam hari ini “menyembunyikan ajaran Islam yang sebenar¹⁹”.

Tujuan mereka mencaci dan menuduh para alim ulama Islam ialah supaya para alim ulama Islam dipandang rendah dan hina oleh penganut-penganut ajaran sesat. Bila racun hasutan sudah masuk dalam jiwa mereka maka penganut-penganut atau anggota-anggota ajaran sesat itu menjadi begitu taasub dan taat kepada pak guru atau pak sheikh. Bahkan mereka sanggup berkorban apa sahaja walaupun jika diperlukan oleh pak guru yang mursyid, itu nyawa mereka sekalipun. Waktu itu jika ada orang-

¹⁵ Islam bukan hanya menuntut umatnya beribadat tetapi juga menuntut umatnya beribadat mengikut cara yang telah ditentukan. Umat Islam dilarang beribadat tanpa berpandukan amalan Rasulullah s.a.w yang disebutkan dalam hadits yang sah.

¹⁶ Islam tidak mengajar umatnya sedemikian. Hatta Rasulullah s.a.w tidak pernah menguasai harta dan isteri para sahabatnya.

¹⁷ Islam mengiktiraf kewujudan keramat tetapi perkara yang ajaib yang berlaku tidak semestinya keramat. Rujuk nota kaki 2.

¹⁸ Seorang yang mengajar agama yang ikhlas akan sentiasa berpegang pada firman Allah taala

“Tiada ganjaran bagiku kecuali ke atas Allah.” (Hud:29)

Perbuatan ini tidak sejajar dengan adab pendakwah yang tulen.

¹⁹ Ini tidak bersesuaian dengan adab para ulama yang sentiasa menghormati orang lain dan sentiasa merendahkan diri. Rujuk nota kaki 5.

orang yang menegur atau menyalahkan ajaran dan amalan yang diberikan oleh pak guru mereka, biasanya mereka akan bertindak secara kekerasan.

16. Dalam perkara-perkara yang berhubung dengan syariat Islam, seperti Al-Quran, as-Sunnah, rukun-rukun Islam dan Iman serta yang lain-lainnya, mereka mendakwa bahawa setiap yang zahir ada pula yang batin. Biasanya kumpulan ajaran sesat ini mendakwa hanya merekalah yang mengetahui ilmu hakikat dan ilmu isi²⁰.
17. Menggalakkan penggunaan tangkal dan azimat dalam ajaran dan amalan²¹.
18. Mengijazahkan ilmu pada larut malam²².
19. Adanya dakwaan bahawa ajaran diterima melalui ilham, ilmu laduni yang dapat terus dari Allah taala, dalam mimpi atau solat hajat²³.
20. Guru yang mendakwa sebagai Imam Mahdi, Nabi Isa²⁴ dan wali²⁵ yang memiliki keramat.
21. Guru mendakwa dirinya maksum²⁶ (terpelihara dari dosa).
22. Mentafsir Al-Quran berdasarkan pemikiran sendiri tanpa ilmu dan kelayakan yang diperlukan, dan tafsirannya amat jauh dan berbeza dari pandangan ulama-ulama yang

²⁰ Rujuk pada bab yang khusus mengenainya.

²¹ Islam melarang penggunaan tangkal dan azimat. Rasulullah s.a.w bersabda

“Sesiapa yang menggantung tamimah (sejenis tangkal yang bertujuan untuk mendapat kesempurnaan) nescaya Allah tidak akan menyempurnakannya dan sesiapa yang menggantung wad’ah (sejenis tangkal yang bertujuan untuk mendapat keamanan) nescaya Allah tidak akan mengamankannya” (Riwayat Ahmad)

“Sesiapa yang menggantung tamimah (tangkal) sesungguhnya ia telah syirik” (Riwayat Ahmad)

²² Tiada perintah khusus dalam Islam mengenai perkara ini.

²³ Ilham dan firasat sememangnya wujud dan diakui oleh Islam tetapi bagi selain para anbiya’, ilham, firasat dan apa jua yang dikurniakan oleh Allah taala kepada selain para anbiya’ tidak mungkin berlaku sebagai tasyri’ (pensyariatan hukum) kerana tasyri’ hanya berlaku melalui proses wahyu yang dikurniakan kepada para anbiya’ dan rasul. Ilham dan firasat bagi manusia biasa boleh berlaku dalam bentuk petanda-petanda akan sesuatu tetapi bukan dalam bentuk tasyri’.

²⁴ Isa Al-Masih yang akan turun ke bumi ialah Isa anak Mariam dari keturunan Bani Israil atau Yahudi.

²⁵ Wali sebenar ialah seorang yang bertakwa dengan sebenar-benarannya dan dia tidak mengaku dirinya seorang wali kerana taraf wali adalah kurniaan Allah taala bukan sesuatu yang didakwa atau dituntut oleh seorang hamba.

²⁶ Maksum adalah taraf yang hanya diberikan pada para nabi dan rasul.

muktabar²⁷.

23. Guru mendakwa sebagai pengganti Rasulullah s.a.w²⁸.
24. Guru mendakwa bahawa ia menerima wahyu dari Allah ta'ala²⁹.
25. Ajaran bahawa masih ada nabi dan rasul selepas nabi Muhammad s.a.w³⁰.
26. Ajaran wujudnya percantuman agama- Islam, Kristian dan Yahudi³¹.
27. Ajaran menunaikan haji ke tempat lain selain dari Mekah³².
28. Dakwaan bahawa guru boleh menjelma sebagai Rasulullah s.a.w atau para sahabat khususnya Khulafa' Ar-Rasyidin³³.

²⁷ Ini dilarang dalam Islam. Rasulullah s.a.w bersabda

“Barangsiapa bercakap tentang Al-Quran dengan pendapatnya atau dengan apa yang ia tidak ketahui maka silakanlah mengambil tempat duduknya dalam neraka.” (Riwayat Abu Daud & At-Turmuzi)

“Barangsiapa bercakap tentang Al-Quran dengan fikirannya lalu ia betul namun ia tetap dipandang salah juga.” (Riwayat At-Turmuzi)

²⁸ Rujuk nota kaki 4.

²⁹ Wahyu hanya diturunkan pada nabi dan rasul. Setelah kewafatan Rasulullah s.a.w, tiada lagi wahyu diturunkan.

³⁰ Rujuk nota kaki 4.

³¹ Islam yang dibawa oleh Rasulullah s.a.w adalah syariat terakhir sehingga Hari Kiamat. Ia adalah kesinambungan dari syariat dahulu. Syariat yang dibawa oleh Rasulullah s.a.w memansuhkan syariat yang lalu. Islam telah sempurna Allah taala berfirman

“Hari ini Aku telah sempurnakan bagi kamu Din kamu dan Aku sempurnakan terhadap kamu nikmatKu dan Aku redha bagi kamu Islam sebagai Din” (Al-Maidah: 3)

“Dan barangsiapa yang mencari selain Islam sebagai cara hidup maka tidak akan diterima darinya dan dia di Akhirat akan tergolong dari golongan orang-orang yang rugi” (Ali-Imran : 85)

Oleh itu tiada keperluan bagi penggabungan antara agama Islam, Yahudi dan Nasrani.

³² Ini bercanggah dengan firman Allah ta'ala

“Sesungguhnya rumah pertama yang diletakkan untuk manusia ialah yang berada di Mekah yang diberkati.” (Ali Imran : 96)

³³ Roh mereka yang telah meninggal dunia di tempatkan di alam barzakh. Tiada siapa yang mengetahui mengenainya selain Allah ta'ala. Allah ta'ala berfirman

“Katakanlah bahawa ruh adalah urusan tuhanku. Dan tidaklah kamu dikurniakan ilmu kecuali sedikit sahaja” (Al-Isra':85)

29. Dakwaan dapat berhubung terus dengan Allah ta'ala³⁴.
30. Dakwaan pernah bertemu dan didatangi oleh malaikat Jibril atau malaikat lain³⁵.
31. Dakwaan dirinya sebagai malaikat³⁶.
32. Dakwaan tahu akan ketibaan Hari Kiamat³⁷.
33. Dakwaan mempunyai ilmu kebal³⁸.
34. Larangan dari bernikah dengan mereka yang bukan ahli kumpulan³⁹.
35. Mengajar sesuatu melalui proses menurun.

Berdasarkan ini, tiada sesiapa yang dapat mengetahui mengenai ruh dan dakwaan bahawa yang menjelma adalah ruh Rasulullah s.a.w atau sahabat atau wali-wali adalah tidak benar.

³⁴ Ini bercanggah dengan firman Allah taala

“Dan tidak ada bagi seorang manusia pun bahawa Allah berkata-kata dengan dia kecuali dengan perantaraan wahyu atau dari belakang tabir atau dengan mengutus seorang utusan (malaikat) lalu diwahyukan kepadanya dengan izinNya apa yang Dia kehendaki. Sesungguhnya Dia Maha Tinggi lagi Maha Bijaksana” (Asy-Syura : 51)

³⁵ Tugas Jibril ialah untuk menyampaikan wahyu. Setelah kewafatan Rasulullah s.a.w tiada lagi wahyu yang diturunkan, maka dakwaan bertemu dengan Jibril adalah tidak benar. Dakwaan bertemu dengan malaikat juga bukanlah satu bukti akan kebenaran ajaran yang diajarkan.

³⁶ Malaikat adalah makhluk yang diciptakan atas bentuk yang tersendiri. Malaikat adalah makhluk yang dicipta dari cahaya. Rasulullah s.a.w bersabda

“Telah dicipta malaikat dari cahaya. Telah dicipta jin dari nyala api. Telah dicipta Adam dari apa yang telah diterangkan pada kamu.” (Riwayat Muslim)

³⁷ Kedatangan Hari Kiamat hanya diketahui oleh Allah ta'ala. Allah ta'ala berfirman:

“Mereka bertanya pada kau mengenai As-Sa'ah (Kiamat), bilakah datangnya?. Katakanlah : Sesungguhnya pengetahuan mengenainya adalah di sisi Tuhanku. Tidak seorang pun yang dapat menjelaskan mengenai waktunya kecuali Dia.” (Al-A'raf:187)

³⁸ Ilmu kebal sememangnya wujud. Ia boleh merupakan sesuatu yang dituntut atau kurniaan Allah ta'ala. Walaubagaimana pun ia bukanlah dalil yang menunjukkan kebenaran sesuatu ajaran.

³⁹ Sesiapa sahaja mencukupi syarat-syarat sah nikah dengannya halal untuk dinikahi. Mewujudkan larangan yang tidak dilarang oleh Allah ta'ala adalah bid'ah yang keji. Rasulullah s.a.w bersabda

“Barangsiapa yang beramal dengan sesuatu amalan yang bukan dari urusan (ajaran) kami maka ia ditolak.” (Riwayat Muslim)

36. Ajaran yang memberi penekanan kepada memperolehi bantuan dari orang yang mati atau kubur-kubur⁴⁰.
37. Dakwaan pernah berdialog dengan Nabi Noh, Musa dan lain-lain⁴¹.
38. Dakwaan dapat menunjukkan syurga dan neraka⁴².
39. Ajaran yang membatalkan solat Jumaat⁴³.
40. Menafikan ke-Islaman orang yang di luar kumpulan⁴⁴.
41. Ajaran tidak menggunakan buku yang muktabar tetapi hanya berdasarkan nota-nota tulisan tangan dan rajah-rajah⁴⁵.

⁴⁰ Memohon sesuatu hajat melalui kuburan adalah dilarang kerana ia akan menjurus pada syirik.

⁴¹ Persoalan ini sama dengan persoalan ruh. Rujuk nota kaki 31.

⁴² Syurga dan neraka adalah antara perkara ghaib yang hanya Allah sahaja yang mengetahui hakikatnya. Kita hanya wajib mengetahui mengenai syurga dan neraka sekadar apa yang diterangkan oleh Allah taala dan Rasulullah s.a.w.

⁴³ Ini bercanggah dengan firman Allah taala

“Wahai orang-orang beriman! Jika diseru untuk menunaikan solat di hari Jumaat maka bersegeralah untuk mengingati Allah dan tinggalkanlah jual beli. Yang demikian itu lebih baik bagi kamu sekiranya kamu mengetahui.” (Jumuah : 9)

Menafikan sesuatu kewajiban boleh menjurus kepada kekufuran.

⁴⁴ Ini adalah terlarang. Rasulullah s.a.w bersabda

“Jika berkata seseorang kepada saudaranya “Hai Kafir!” maka akan menimpa (kekufuran) kepada salah satu dari antara keduanya” (Riwayat Al-Bukhari & Muslim)

“Sesiapa memanggil seseorang dengan kekufuran atau berkata kepadanya “musuh Allah” sedangkan ia tidak sedemikian, maka kembali perkataan itu kepadanya” (Riwayat Al-Bukhari & Muslim)

Menuduh orang Islam sebagai kafir akan membawa kekufuran.

⁴⁵ Ajaran Islam disandarkan pada Al-Quran dan hadits dan dihuraikan oleh buku-buku para ulama yang telah dikenali umum bukan berdasarkan gambar rajah.

